



梵網經合註
卷二
之三

冊二



Inches
Centimetres
1 2 3 4 5 6 7 8 9 10 11 12 13 14 15 16 17 18 19 8
TIFFEN Color Control Patches
© The Tiffen Company, 2007

0 10 20 30 40 50 60 70 80 90 100 110 120 130 140 150 160



佛說梵網經菩薩心地品合註

卷第二

姚秦三藏法

羅什譯

羅什譯

明菩薩沙彌古吳智旭註

菩薩比丘溫陵道昉訂

已三明才金剛心三初總徵二別釋三結指

今初

盧舍那佛言。千佛諦聽。汝先言金剛種子有十心。

金剛種子者。修習中觀。能為金剛十地而作種子。

又三十心皆是種子。惟此十心。倍為堅固。故名金

剛。別則一心分對一向。圓則位位具修。此心乃至

南亞研究
所藏書章

妙覺究竟此心。今就義便。且約次第中觀為解。又復大似圓家十信。一信。二念。第六不退名義皆同。深心迴向。即精進義。達即慧義。直即定義。大乘不異護心。無相還同迴向。慧心與戒。不壞與願。取義稍殊。亦不甚遠。良繇界外機宜不同。或接或借。致成異趣。圓人稱性修觀。總皆攬入一念心中。無違妨也。

庚二別釋十初信心。至十不壞心。辛今初

若佛子。信者。一切行以信為首。眾德根本。不起外道邪見心。諸見名著。結有造業。必不受。入空無為法中。

三相無無。生無生。無住住。無滅滅。無有一切法空。世諦第一義諦。智盡滅異空。色空細心。心空細心。心空故。信信寂滅。無體性和合。亦無依然主者。我人名。用三界假我。我無得集相。故名無相信。

信為道源功德母。長養一切諸善根。以信力故。不起外道邪見心。及一切世間種種妄見名字計著。能結三有果報。能造善惡諸業者。亦必不受。入於真空無為法中。生住滅相。當體皆無。亦并無無相可得。所謂生即無生。無生即生。無住而住。住即無住。無滅而滅。滅即無滅。不惟無一切法。亦無一切

法空。惟以照了世諦第一義諦之權實妙智盡滅。凡外所計異色之空。及色界空界之微細心想。二乘心空之微細心智。如是心心皆空故。方生中道實信。信於中道寂滅之理。了知諸法不自生。故無體性。不共生。故無和合。不無因。故無依然。依然卽是自然。不他生。故無主者。我人名。但用三界假名之我。而此我實無得集之相。故名無相信也。此亦可別對救護衆生離衆生相迴向者。入空無爲法中。卽純潔精真義。不起邪見。不受結業等。卽遠諸留患義。用三界假我。我無得集相。卽當度衆生滅。

除度相義。心心空。故信信寂滅。卽迴無爲心向涅槃路義。

②二念心

若佛子。作念六念。常覺乃至常施。第一義諦。空無著。無解。生住滅相不動。不到去來。而於諸業受者。一合相。迴向入法界智。慧慧相乘。乘乘寂滅。燄燄無常。光光無無。生生不起。轉易空道。變前轉後。變轉化化。化轉轉變。同時同住。燄燄一相生滅。一時已變。未變。變變。化亦得一。受亦如是。

作念者。能念之觀慧。六念者。所念之諦境也。能念

無非一心三觀所念無非一境三諦常覺下先釋所念迴向下次釋能念常覺者心外無佛佛即是心乃至者略指法僧戒天心外無法法即是心名常法心外無僧僧即覺法和合名常僧無作妙戒究竟色相名常戒第一義天法爾性德名常天三輪體寂究竟大施名常施名雖有六實惟第一義諦此總明三諦圓融之境也空字別明真諦無著無解別明俗諦生住滅相現在不動不到過去未來別明中諦既所念之境三諦一諦不可思議惟一合相則於六念諸業及受用此法者當知亦皆

是法界一合相也迴向入法界智者若念佛時佛爲法界一切法趣佛乃至若念施時施爲法界一切法趣施此總明三觀圓融之念也慧慧相乘等別明即空妙觀喻於慧無常即相乘義光喻於乘無無即寂滅義生生不起等別明即假妙觀謂雖是生生不起而復轉易空道所謂變前轉後變轉化化轉轉變無盡重重不可思議也變者指能念之慧化者指所念之境因佛法等境生於能念之慧故名爲變因於念慧復成佛法等境故名爲化同時同住等別明即中妙觀謂雖變化轉易

而復同時同住。猶如燈炷。燄燄一相生滅一時。所謂過去已變。未來未變。現在變變。無不同時同住也。言同時者。如生住滅三相。一往謂是三世。然生相生時。滅相則滅。住相生時。生相則滅。滅相生時。住相則滅。住相滅故。住亦名滅。滅相生故。滅亦名生。生相滅故。生亦名滅。住相生故。住亦名生。又正生時。生亦名住。正滅時。滅亦名住。則一相中皆具三義。皆具三名。故同時也。言同住者。義無實性。名無實體。生不自生。亦不他生。亦不共生。不無因生。住不自住。亦不他住。亦不共住。不無因住。滅不自

滅。亦不他滅。亦不共滅。不無因滅。四性推檢。求於生住滅之異相。了不可得。惟一無生無住無滅之法性。故同住也。燄燄一相。喻於同住。生滅一時。還喻同時。既能念之慧。三觀一觀。不可思議。惟是一相一時。則所念化境。亦得一相一時。而受用此法者。亦復如是一相一時矣。此亦可別對不壞迴向者。若非一境三諦一心三觀。皆為可壞之法。以離真言俗離。俗言真離。真俗而言中。總非法界究竟了義。今悉離此諸離。故名不壞也。

辛三迴向心

若佛子。深心者。第一義空。於實法空。智照有實諦。業道相續。因緣中道。名爲實諦。假名諸法。我人主者。名爲世諦。於此二有諦。深深入空。而無去來。幻化受果。而無受。故深深心解脫。

題稱迴向。文名深心者。迴二邊。向中道理。極淵微。故也。此深心者。卽是第一義空。謂於眞實法空。智中。雙照有實二諦。咸歸一實。有卽世諦。實卽眞諦。何謂眞諦。卽是業道相續。十二因緣中之道理。是也。業從惑起。必招苦果。舉一該二。成大緣起。其中道理。所謂菩提涅槃。元清淨體。能生諸緣。緣所遺

者。雖是所遺。不在緣外也。何謂世諦。卽假名諸法。我人主者是也。本無實法。惟依世俗假說。凡外不了。乃成二執耳。此二諦者。實諦情無理有。世諦理無情有。故同名有諦。深深入於第一義空。而無去來者。所謂性眞常中。求於去來。迷悟生死。了無所得也。幻化受果。而無受者。所謂因緣和合。虛妄有生。因緣別離。虛妄名滅。當處出生。隨處滅盡也。此亦可別對等一切佛迴向者。本覺湛然。覺齊佛覺。故名深深心解脫也。

辛四達心

若佛子。達照者。忍順一切實性。性性無縛無解。無礙法達。義達。辭達。教化達。三世因果。衆生根行。如如不合不散。無實用。無用。無名。用用。一切空空。空。照達空。名爲通達。一切法空。空空如如。相不可得。

精真發明。名爲達照。以此菩薩所證忍法。順於一切實性。知彼性性。皆本無結縛。亦無解脫。故能發生四無礙辯。所謂法達。能知種種法相。義達。能知所詮義趣。辭達。能知名句文身。教化達。能作種種莊嚴樂說。惟其心輪通達。所以口輪無礙。蓋既了知三世因果及衆生根性業行。皆悉如於真如。不

合不散。本無實法。故能用於無以爲用。而作隨智說。亦本無名。故能用於用以爲用。而作隨情說。如是若實若名。一切皆空。能空之智亦空。照達此第一義空之理。名爲通達。一切法空。彼空空之智。如如之理。其相皆不可得也。此亦可別對至一切處迴向者。達照卽是真精發明地。如佛地之義。

辛五直心

若佛子。直者。直照取緣。神我入無生智。無明神我空。空中空。空空理心。在有在無而不壞。道種子。無漏中道一觀。而教化一切十方衆生。轉一切衆生皆薩婆

若空直直性。直行於空。三界生者。結縛而不受。

正念真如。名爲直心。真如徧一切法。無所不在。故以直心照了彼取緣神我。入無生智也。無明卽指取緣。取緣神我本空。空中亦空。卽是雙遮。而此空空理心。在有在無而不壞中道種子。卽是雙照。以此無漏中道一觀。教化衆生。令其皆入薩婆若海。梵語薩婆若。此翻一切智智。三智一心中得名。一切智智。卽究竟果覺也。繇達無明神我本空。而證中道一實之理。故內秉直性。外行直行。內外一如。則於空華幻夢之三界。所有生者結縛。雖隨意遊戲出沒。而不受其顛倒矣。此亦可別對無盡功德藏。迴向者。教化衆生。皆薩婆若。卽所謂世界如來。互相涉入。得無罣礙也。

辛六不退心

若佛子。不退心者。不入一切凡夫地。不起新長養諸見。亦復不起集因相似我人。入三界業。亦行空。而不住退。解脫於第一中道。一合行。故不行退。本際無二。故而不念退。空生觀智如如。相續乘乘。心入不二。常空生心。一道一淨。爲不退。一道一照。

三不退位。繇於三不退智而成。初句總標。不入下。

別釋三不退位。空生下。別明三不退智。常空下。總結三智。一心中修。三位一心中證也。不入凡夫地。是位不退果。不起新長養諸見。我人等。是位不退因。新者。謂行人已伏故惑。而入禪那。若於禪那中。不善觀察。發起愛見。宿習名之爲新。今善修不退心故。故惑消滅。新惑不生。見愛二習皆悉寂滅。雖示現入三界業。亦常行於空理。故得證位不退。言不住退。卽是位不退也。此位不退。雖似與二乘共。然二乘豈能入三界業。故知圓位殊勝。空非但空。只須明此一種不退。已非權小境界。況具明三不

退耶。次明所證解脫。乃於第一中道一合而行。不。同二乘解脫。故不行退。次明了知生死本際。卽涅槃本際。煩惱本際。卽菩提本際。更無二際。念念恆與薩婆若智相應。而不念退。此三不退。理趣甚深。良繇三智所證。空生觀智如如。卽是位不退智。相續乘於大乘。卽是行不退智。心入不二本際。卽是念不退智。如此三智。一心中修。名爲常空生心。卽是無住生心之義。善契心體。名爲一道。不染二邊。名爲一淨。是爲不退一道。一照。乃理智一如之極致也。此亦可別對隨順平等善根迴向者。謂於同

佛地中。各各生清淨因。取涅槃道。故能圓證三不退理。然三不退若分屬者。別教位不退在第七住。行不退在十迴向。念不退在歡喜地。圓教位不退在初信。必行不退在第十心。念不退在發心住。今合明之。正顯隨順平等善根義故。

⑦七大乘心

若佛子。獨大乘心者。解解一空。故一切行心名一乘。乘一空智。智乘一行乘。乘智心心任載任用。任載任一。切衆生度三界河結縛。河生滅河行者坐乘。任用載用智乘。趣入佛海。故一切衆生未得空智任用。不名

為大乘。但名乘得度苦海。

惟一佛乘。無二無三。自成佛道。轉化一切皆令成佛。故名獨大乘心。所謂若二乘解。若菩薩解。究竟皆歸第一義空。達此畢竟第一義空。所以一切行心皆名一乘。謂乘於一空之一切種智也。而此獨大乘心者。亦名智乘。亦名行乘。以乘此一切種智之心。此心堪任載諸衆生。堪任用趣佛海。故得名為智乘及行乘也。何謂任載。謂任荷衆生。令度三界苦果之河。惑業結縛之河。無明生滅之河。而此行者。不居此彼二岸。不住中流。常坐是乘而行。濟

度所以名行乘也。何謂任用。謂所載衆生。皆用智乘。令其悉得趣入佛海。不令一人墮二乘地。所以名智乘也。故使一切衆生。設有一人未得此空智任用者。則不名爲大乘。但名爲乘。得度苦海而已。此卽反顯獨大乘心。必能等觀一切衆生。皆以如來滅度而滅度之也。空智任用者。卽是中道應本。亦卽無住生心之義。若不令衆生同得此道。不名大乘。蓋不惟聲聞緣覺。缺此大心。卽藏通二佛。究竟止歸灰斷。亦不得名爲獨大乘心。此亦可別對隨順等觀一切衆生。迴向也。

辛八無相心

若佛子。無相心者。妄想解脫。照般若波羅密無二。一切結業三世法。如如一諦。而行於無生空。自知得成佛。一切佛是我等師。一切賢聖是我同學。皆同無生空。故名無相心。

無生死相。無涅槃相。無煩惱相。無菩提相。無十界差別相。無十界平等相。名無相心。所以若妄想若解脫。照之以般若波羅密。而皆無二。一切結業三世法。皆卽如如一諦。結者。煩惱惑。卽般若業者。善不善不動。有漏業業。卽解脫。三世法者。去來現在。

三界苦果。苦卽法身。三德秘藏。惟一實理。如理妙智。名爲無生空智。行於此智。了了自知。作佛。佛卽我師。賢聖卽我同學。以諸佛菩薩同修同證。此無生空故。此亦可別對真如相。迴向者。想脫無二。所謂卽一切法。如如一諦。所謂離一切相。行無生空。所謂惟卽與離。二無所著也。

辛九慧心

若佛子。如如慧者。無量法界。無集無受生。生生煩惱而不縛。一切法門。一切賢所行道。一切聖所觀法。所有亦如是。一切佛教化方便法。我皆集在中心。外道

一切論邪定功用。幻化魔說佛說。皆分別入二諦處。非一非二。非有陰界入。是慧光明。光明照性。入一切法。

發趣中慧。雖明知體名心。而入空義強。故標空慧。長養中慧。雖亦發無生心。而出假義強。故云作慧見心。今則正顯契合中道之慧。故云如如慧也。此慧不落凡情。不著聖解。何謂不落凡情。謂達無量法界。無有集者。亦無有受生者。雖似有生生不停之煩惱。而實不縛也。何謂不著聖解。謂一切法門。賢所行。聖所觀。所有諸法。亦復如是不縛著也。既

凡聖二法。永無執著。則能善用。凡聖諸法。故一切諸佛教化方便。皆集心中。乃至外論邪定等。皆悉分別。入二諦處。謂佛法是真諦。魔外是俗諦。又魔佛差別。是俗諦。魔佛一如是真諦。真不違俗。故非一。俗不違真。故非二。既達斯致。則五陰亦非陰。十八界亦非界。十二入亦非入。清淨本然。惟是真慧光明。而此光明照性。普入一切法中。卽所謂真得。所如十方無礙。故亦可別對無縛。解脫迴向也。

辛 十不壞心

若佛子。不壞心者。入聖地智。近解脫位。得道正門。明

菩提心。伏忍順空。入魔不壞。衆聖摩頂。諸佛勸發。入摩頂三昧。放身光。光照十方國土。入佛威神。出沒自在。動大千界。與平等地。心無二無別。而非中觀。知道以三昧力。故光中見佛無量。國土現爲說法。爾時卽得頂三昧。證虛空平等地。總持法門。聖行滿足。心心行空。空空慧中。道無相照。故一切相滅。得金剛三昧法門。入一切行門。入虛空平等地。

十金剛心。皆以不壞爲義。此居最後。獨膺不壞之名。此心乃是能入聖地之智。已近解脫之位。得中道之正門也。入聖地智。是般若德。近解脫位。是解

脫德。得道正門。是法身德。入聖地智。卽明實智。菩提。近解脫位。卽明方便菩提。得道正門。卽明真性。菩提。又入聖地智。卽明了因慧心。近解脫位。卽明緣因善心。得道正門。卽明正因理心。故曰明菩提心也。此爲地前伏忍極位。順於第一義空之理。第一義空。不住生死。故界內陰魔煩惱。魔死魔天。魔所不能壞。不住涅槃。故界外苦無常無我不淨四。勸發。遂入摩頂三昧。放光普照。亦能入佛威神。出沒自在。動大千界。儼然與登地者無別。而猶不名

爲初地者。以其尚在伏忍。猶屬相似。中觀非以眞實中觀。知道故也。但以摩頂三昧力。故光中見佛。聞法。卽得入頂三昧。此於凡位之中。最爲尊上。猶藏教所謂世第一位。入此位已。無間卽證虛空平等地門。總一切法。持一切義。知一切法。卽心自性。性具功德。任運現前。無作妙行。當下滿足矣。然菩薩所以能捨凡入聖者。良繇三十心法門。心心皆行於空理。以此空空之慧。中道無相照故。所以一切諸相。皆悉寂滅。乃能得是金剛三昧門。入一切行門。入虛空平等地也。此亦可別對法界無量迴

向者。性德圓成。法界量滅。是真不壞義故。

庚三結指

如佛華經中廣說。

己四明十地。二初總徵。二別釋。庚今初

盧舍那佛言。千佛諦聽。汝先問地者有何義。

上荷佛法。下荷衆生。功德智慧之所歸趣。慈悲巧

便之所從生。故名爲地。別則平等慧卽歡喜地。乃

至入佛界卽法雲地。圓則歡喜乃至法雲十地。地

地皆悉具平等義。具善慧義。具光明義。具爾燄義。

具慧照義。具華光義。具滿足義。具佛吼義。具華嚴

義。具佛界義。又理卽平等。乃至究竟平等。理卽佛

界。乃至究竟佛界。中間例知。今就義便。且約分證

法身爲解。至於一地一切地。一切地一地。行布圓

融。雙照無礙。入斯地者。當自知之。

庚二別釋十。初平等地。至十入佛界地。辛今初

若佛子。菩提薩埵。入平等慧體性地。眞實法化。一切

行華光滿足。四天果。乘用任化無方。理化神通。十力

十號。十八不共法。住佛淨土。無量大願。辯才無畏。一

切論。一切行。我皆得入。生出佛家。坐佛性地。一切障

礙。凡夫因果。畢竟不受。大樂歡喜。從一佛土入無量

佛土。從一劫入無量劫。不可說法為可說法。反照見一切法。逆順見一切法。常人二諦而在第一義中。以一智知十地次第。一事示衆生。而常心心中道。以一智知一切佛土殊品。及佛所說法。而身心不變。以一智知十二因緣。十惡種性。而常住善道。以一切智見有無二相。以一智知入十禪支行。三十七道。而現一切色身六道。以一智知十方色色分分。了起入受色報。而心心無縛。光光照一切。是故無生信忍空慧。常現在前。從一地二地。乃至佛界。其中間一切法門。一時而行。故略出平等地功德海藏行願。如海一滴。

毛頭許事

前標名中稱體性平等地者。乃是依理立位。亦顯全性起修。今此名為入平等慧體性地者。乃是攝位歸體。亦顯全修在性也。此地從真實性中。出生法化。故一切行華光。皆悉滿足。華表解脫。即是行行。光表般若。即是慧行。三十心中。雖亦具有二行。但是相似解行。今乃真實法化。所謂直法身非法身。法身必具二德。乃稱性滿足也。既證三德三身。即能隨意示現。於第四天而成佛果。乘此平等大慧之用。任運教化。無有方隅。所有神通變化。非關

作意。惟是理性所起。名爲理化神通。卽所謂無記化化通也。言四天者。或指欲界第四兜率天宮。如千百億釋迦等。或指第四禪色究竟天。如千釋迦等。此初地菩薩。已得中道應本。故皆能示現。乃至十力十號十八不共。一時具足。安住實報無障礙土。亦復分證常寂光土。舉凡大願辯才等佛地功德。我皆得入。捨凡夫性。入如來性。大樂歡喜。故亦名爲歡喜地也。知刹土平等無性。一卽無量。故能橫徧十方。知時劫亦平等無性。無量卽一。故能豎窮三世。徹證不可說之法性。而以四悉檀因緣善

巧方便爲衆生說。不背法性。知一切法卽是中道。性德名反照。知一切法皆空。名逆見。知一切法皆假。名順見。地前仰修中道。猶謂迴出二邊。今知中道徧一切法。故常入二諦。而卽在第一義中。了知卽事卽理。故以十地事示衆生。而心心中道。了知差別卽無差別。故知佛土說法殊品。而身心不變。深達性惡卽是性善。故知因緣十惡。而常住善道。雙照有無二相。名一切智。故非偏空。雖行出世道。而不住涅槃。故現一切色身六道。善能分別諸法。相於第一義而不動。故於色色支分。雖了其起處。

入處及受報處。而心心無縛。光光照一切。此則證於念不退位。入於無功用道。故無生信。忍空慧常。現在前。於一地中。通達一切諸地法門。故能一時而行。良繇教道雖別。證道同圓。故功德海藏。非言所罄也。

辛二善慧地

若佛子。菩提薩埵善慧體性地。清淨明達。一切善根。所謂慈悲喜捨慧。一切功德本。從觀入大空慧。方便道智中。見諸衆生。無非苦諦。皆有識心。三惡道刀杖一切苦惱緣中生識。名爲苦諦。三苦相者。如者。如身

初覺從刀杖身色陰二緣中生覺。爲行苦緣。次意地覺緣身覺所緣。得刀杖及身瘡腫等法。故覺苦苦緣。重故苦苦。次受行覺二心緣向身色陰壞瘡中生苦覺。故名爲壞苦緣。是以三覺次第生三心。故爲苦苦。苦一切有心衆生。見是三苦。起無量苦惱因緣。故我於是中。入教化道三昧。現一切色身。於六道中。十種辯才。說諸法門。謂苦識苦緣。刀杖緣具苦識行身瘡腫發壞。內外觸中。或具不具。具二緣中生識。識作識受。觸識名爲苦識。行二緣故。心心緣色。心觸觸惱受。煩毒時爲苦苦。心緣識初在根覺緣。名爲苦覺。心作

心受觸識覺觸未受煩毒時是名行苦。逼迤生覺如
斲石火。於身心念念生滅。身散壞轉變化。識入壞緣。
緣集散。心苦心惱。受念後緣染著。心心不捨。是爲壞
苦。三界一切苦諦。復觀無明集。無量心作一切業。相
續相連。集因集。因名爲集諦。正見解脫空空。智道心
心。名以智道道諦。盡有果報。盡有因。清淨一照體性。
妙智寂滅。一諦慧品具足。名根。一切慧性起空入觀。
是初善根。第二觀捨一切貪著。行一切平等空捨。無
緣而觀。諸法空際一相。我觀一切十方地土。皆吾昔
身所用。故土。四大海水。是吾故水。一切劫火。是吾昔

身故所用火。一切風輪。是吾故所用氣。我今入此地
中。法身滿足。捨吾故身。畢竟不受四大分段不淨故
身。是爲捨品具足。第三次觀於一切所化衆生。與人
天樂。十地樂。離十惡畏樂。得妙華三昧樂。乃至佛樂。
如是觀者。慈品具足。菩薩爾時住是地中。無癡無貪。
無瞋。入平等一諦智。一切行本。遊佛一切世界。現化
無量法身。如一切衆生。天華品說。

此中子科分三。初菩提下。總標德本。次從觀下。釋
三品觀。三菩薩爾時下。結顯德用。初中言善慧者。
此地亦名離垢。垢是所離。慧是能離。又垢是所治。

善是能治也。以善慧而離垢穢。垢離故善根清淨。慧朗故善根明達。言一切者。卽指十善之法。乃是五乘根本。具如華嚴二地所明。而十善又不出慈悲等五品觀也。次釋三品觀者。對治癡貪瞋三毒根本。良以三毒爲十惡之源。故須三品妙觀治之。慈品具足。則悲喜在其中矣。復分爲三。初釋慧品。次釋捨品。後釋慈品。初中又三。從觀入大空慧。方便道智中句。爲總標。見諸衆生下。爲詳釋。慧品具足。下爲總結。標中總明。絲觀行力。入大空慧體。起方便道智差別之用。具足觀於三界四諦。次詳釋。

復四。初觀苦諦。二觀集諦。三觀道諦。四觀滅諦。初觀苦諦者。謂一切衆生皆有識心。彼於三惡道及諸刀杖。乃至人天一切苦惱緣中。生於受苦之識。名爲苦諦。而此苦諦。具有三相。所謂三苦相者。三界皆悉有之。今就眼前易見之事。而爲指點。故云如者。且如於身未觸境時。本初有覺知之性。卽是第五身識。從彼刀杖及身色陰之二緣中。生於覺知未受煩毒。爲行苦緣。次意地覺。卽是同時意識緣。此身覺所緣。乃得刀杖及身瘡腫等法。具受煩毒。故覺苦苦緣。以苦惱重。故名爲苦苦。次從受苦。

覺及行苦覺二心緣於向來身色陰壞瘡中復生苦覺名壞苦緣受苦覺卽同時意識之所引生行苦覺卽五身識之所引生也是以從身覺意地覺受行覺之三覺次第生行苦苦壞苦之三心故總名爲苦苦苦此於三受之中且但約苦受以明三苦於苦受中又且約生時名行苦住時名苦苦滅時名壞苦實則三苦徧於三時亦復徧於三受亦復徧於三界也一切衆生見是三苦境界不達其因不知其緣展轉迷亂更起無量苦惱因緣可悲可憫故意輪入教化道三昧身輪普現一切色

身口輪以十無盡辯才說諸法門說何等法謂一切衆生苦識爲本生於苦緣彼刀杖緣具觸於苦識行相所緣之身而瘡腫發壞雖意家內觸及五根外觸或時有具不具但令具根塵二緣中生分別識本從識作識還自受卽此覺觸之識名爲苦識繇行於根塵二緣故心心緣色彼心相應之觸心所觸於惱害境界受煩毒時爲苦苦彼心中緣慮之識初在根門覺於塵緣名爲苦覺本從心作心還自受卽彼觸識覺於觸塵尚未受煩毒時是名行苦因於境緣逼迫復生覺觀如斲石火念念

生滅不稍停住。身既有散壞轉變。其識入於壞緣之中。隨此緣之若集若散。心苦心惱。而領受之念。仍於後緣染著。心心不捨。是爲壞苦。此名三界一切苦諦也。二觀集諦者。無明卽是集諦。謂以無量無知染汙之心。作一切有漏善惡不動等業。爲六道相續相連之集因。卽此集因。真是苦因。更無異因。是名爲集諦也。相續者。前後不斷。謂無始至今。常如輪轉。相連者。一卽一切。謂六道因果。更互牽連。三觀道諦者。以正見破無明惑。則諸業解脫。果報空空。惟有智道。心心現前。名以智道道諦。道諦

雖多。智慧爲首。智道心心。猶言心心。智道也。四觀滅諦者。盡諸有之果報。盡諸有之生因。惟是清淨一照之體性。妙智名爲寂滅。一諦言體性。妙智者。本來具足之不動智也。清淨是解脫德。一照是般若德。體性是法身德。妙智者。契如之智。不言如而言智者。無如外智。無智外如。故也。三總結者。謂如是觀於四諦。則慧品具足。名爲慧根。於一切慧性起空體而入觀用。是名初善根也。次釋捨品。捨四大而證法身。乃名具足捨品。後釋慈品。隨衆生根性。次第與樂。必以佛樂爲要歸。乃名具足慈品。言

離十惡畏者。愚夫癡狂。不畏惡業。初心菩薩。深畏十惡。未能究竟遠離。二地以無作妙戒。順無染性。永離違犯。得無怖畏。故成大樂。妙華三昧者。上品十善業道。爲第一。最妙莊嚴。三結顯德用者。慧品具足。故無癡。捨品具足。故無貪。慈品具足。故無瞋。無癡卽般若德。無貪卽法身德。無瞋卽解脫德。三德卽是三諦。三諦卽是平等。一諦。平等一諦。卽是一心三智。又無癡卽入一切空行。無貪卽入一切中道行。無瞋卽入一切有行。三行爲萬行本。以此智行二種莊嚴。便能徧遊佛界。徧現化身。一一

化身卽報卽法。三身一體。不可思議。如一切衆生。天華品說。結略指廣也。

辛三光明地

若佛子。菩提薩埵。光明體性地。以三昧解了智。知三世一切佛法門。十二法品名味句。重頌記別。直語偈。不請說律戒。譬喻佛界昔事。方正未曾有。談說是法體。性名一切義別。是名味句中。說一切有爲法。分分受生。初入識胎。四大增長。色心名六住。於根中起實覺。未別苦樂。名觸識。又覺苦樂。識名三受。連連覺著。受無窮。以欲我見戒取。善惡有識。初名生。識終名死。

是十品現在苦因緣果。觀是行相中道。我久已離。故無自體性。入光明神通。總持辯才。心心行空。而十方佛土中。現劫化轉化。百劫千劫。國土中養神通。禮敬佛前。諮受法者。復現六道身。一音中說無量法品。而衆生各自分分得聞。心所欲之法。苦空無常無我。一諦之音。國土不同。身心別化。是妙華光明地中。略開一毛頭許。如法品解觀法門。千三昧品說。

以三昧解了智者。從三昧所起之智。所謂靜極明生。名發光也。名味句。亦稱名。句。文。味。卽文也。名。詮。自性。句。詮。差別。文。卽是字。爲名。句。之所依。十二法

品者。一重頌。卽是祇夜。二記別。卽是授記。三直語。卽修多羅。四偈。卽孤起頌。亦名伽陀。五不請說。卽無問自說。六律戒。亦名因緣。因有犯緣。方制戒。故七譬喻。八佛界。亦名本生。九昔事。亦名本事。十方正。亦名方廣。十一未曾有。十二談說。卽是議論。是法體性。名一切義別者。體卽當體。謂文字經卷。又他方六塵。皆得爲體。如玄義所明。性卽所依理體。謂小乘三印。無常無我印。於生死寂滅印。於涅槃大乘一實相印。生死涅槃。無二際故。名卽通別二名。一切義卽宗用。教相等。如此名味句中。雖說無

量法門。要不出於十品因果。謂有爲受生之法。雖分分差別。無不皆具十支。初入識胎爲識支。四大增長名六住。爲名色六入。兩支。實覺未別苦樂名觸識。卽觸支。三受。卽受支。連連覺著受無窮。卽愛支。以愛欲心起我見而生戒取。卽取支。感善惡有卽有支。於後有識初名生。卽生支。識終名死。卽老死支。除無明行二支爲過去因。此卽是十品現在苦因緣果。而此十品遷流造作之相。既不自生。復不他生。亦不共生。不無因生。當體卽空。舉體卽假。全體卽中。有佛無佛。性相常住。非天人修羅梵魔。

外道所作。亦非羅漢辟支菩薩諸佛所作。名爲法界。亦名法位。亦名法性。亦名法住。亦名甚深中道。第一義諦。觀是中道。則能永離生緣。故了知十品皆悉無自體性。入於光明神通。總持辯才。何謂光明神通。謂雖心心行空。而於十方佛土中。現劫化轉化。百劫千劫中。長養神通也。劫化者。延促自在。轉化者。淨穢隨心。何謂總持辯才。謂卽徧十方界。盡百千劫。上諮法言。下詔含識。說法不同。身心別化也。是妙華下。結略指廣。

辛四爾燄地

若佛子。菩提薩埵體性地中。爾真燄俗。不斷不常。卽生卽住卽滅。一世一時一有。種異異現異故。因緣中道。非一非二。非善非惡。非凡非佛。故佛界凡界。一一。是名爲世諦。其智道觀無一無二。玄道定品。所謂說佛心行初覺定。因信覺。思覺。靜覺。上覺。念覺。慧覺。觀覺。猗覺。樂覺。捨覺。是品品方便道。心心入定果。是人住定中。燄燄見法行空。若起念定入生心。定生愛順。道法化生。名法樂忍。住忍證忍寂滅忍。故諸佛於入光光華三昧中。現無量佛。以手摩頂。一音說法。百千起發。而不出定。住定味樂定著定貪定。一劫千劫中。

住定見佛蓮華坐說百法門。是人供養聽法。一劫住定。時諸佛光中摩頂。發起定品。出相進相去向相故。不沒不退不墮不住。頂三昧法上樂忍。永盡無餘。卽入一切佛土中。修行無量功德品。行行皆光明。入善權方便。教化一切衆生。能使得見佛體性常樂我淨。是入人生住是地中行化法門。漸漸深妙。空華觀智。入體性中道。一切法門品滿足。猶如金剛。上日月道品已明斯義。

爾真燄俗者。爾卽真諦。燄卽俗諦。俗卽真故。不斷性無斷故。真卽俗故。不常相無常故。又真卽俗故。

不斷非斷空故。俗卽真故不常性空寂故。謂一切法卽生卽住卽滅。同在一世。同在一時。同在介爾一念有心是故不常。然而種子各異。異於現行之各異故。又卽不斷。如是因緣法之中道當知非一。以雙照故。亦復非二。以雙泯故。乃至善惡凡聖性不可得。故佛界凡界一一皆是假名。建立總名世諦。其智道觀了知無一無二。乃是玄妙中道定品。所謂諸佛往昔心中行道。初始覺悟之定因。凡有十品。是十品覺支方便之道。心心入於定果。故名爲定因也。然十覺止是七覺支法。開出信覺慧覺

觀覺總屬擇法一支。思覺念覺總屬念支。靜覺卽是定支。上覺卽精進支。猗覺卽輕安支。亦名除覺。樂覺卽是喜支。捨覺卽捨支也。是人旣住定中。燄燄照見諸法而行於空。若於定中善能起念。便定入於無住生心境界。然初獲此定者。必定生於愛順也。彼於此中道法中變化生起。是名眞法樂忍。亦名住忍。亦名證忍。亦名究竟寂滅之忍。倘終坐愛順境界。便爲永失。故諸佛於此菩薩正入光光華三昧時。必皆現無量佛。以手摩頂。一音說法。百千方便而起發之。光光華三昧。卽所謂燄燄見法

行空。而此菩薩生愛順故。猶不出定。亦住。亦味。亦著。亦貪。乃至一劫千劫住定。然絲本願善根力故。雖久住定。亦不畢竟入於涅槃。仍能見佛。聞百法門。是人即於定中供養聽法。又更一劫住定。是故諸佛再於光中摩頂。令其發起定品。善知出相。進相。去相。向相。知出相。故不沒。知進相。故不退。知去相。故不墮。知向相。故不住。便於頂三昧法。上樂忍。永盡無餘。不為頂墮菩薩。即入一切佛土。乃至行化法門。漸漸深妙。空華觀智。同入體性中道。一切法門。皆得滿足。猶如金剛。無有缺少矣。空者真諦。華者俗諦也。日月道品。結略指廣。然華嚴明八地菩薩深證無生。諸佛為設三橋七勸。今四地即云爾者。界外機緣。不可思議。惟應仰信而已。

辛 五慧照地

若佛子。菩提薩埵。慧照體性地法。有十種力生品。起一切功德行。以一慧方便。知善惡二業別行。處力品。善作惡作。業智力品。一切欲求。願六道生生果。欲力品。六道性分別不同。性力品。一切善惡根。一一不同。根力品。邪定。正定。不定。是名定力品。一切因果。乘是因。乘是果。至果處。乘因道。是道力品。五眼知一切法。

見一切受生故。天眼力品。百劫事一一知宿世力品。於一切生煩惱滅。一切受無明滅。解脫力品。是十力品。智知自修因果。亦知一切衆生因果分別。而身心口別用。以淨國土爲惡國土。以惡國土爲妙樂土。能轉善作惡。轉惡作善。色爲非色。非色爲色。以男爲女。以女爲男。以六道爲非六道。非六道爲六道。乃至地水火風。非地水火風。是人爾時以大方便力。從一切衆生而見不可思議。下地所不能知覺。舉足下足事。是人大明智漸漸進。分分智光。光無量無量。不可說不可說法門。現在前行。

慧照者。十力妙慧照一切法。悉皆通達。世出世道無與等者。亦名難勝。此十種力。繇善修習之所生成。故名生品。此能徧起一切功德之行。云何爲十。一者以一慧方便。了知善惡二業別行。所謂作善得善報。斯有是處。若得惡報。無有是處。作惡得惡報。斯有是處。若得善報。無有是處。是名爲處力品。二者於一切衆生善作惡作業緣果報。皆悉徧知。是名業智力品。三者於一切衆生所有欲求。謂喜願六道生生果等。名爲欲解力品。四者知六道種性分別不同。名性力品。五者知六道一切善惡根。

上中下一一不同名根力品。六者知衆生邪定正定不定。是名定力品。七者知一切世出世因果之法。乘是因。乘是果。如人乘爲因。還以人乘爲果。乃至佛乘爲因。還以佛乘爲果。其得至果處者。正繇乘此因道。是名道力品。八者以五眼知一切法。見一切衆生受生差別。故名天眼力品。九者於百劫事一一皆知。名宿世力品。言百劫者。猶所謂百劫修行。是心地。實非止於百劫而已。十者於一切招分段生死之煩惱滅。一切受變易生死之無明亦滅。名解脫力品。卽是漏盡智力。是十力品。智能知

自修因果。亦知一切衆生因果分別。而身心口。能各各別用。了達淨穢平等。故應折伏。則以淨國土爲惡國土。應攝受。則以惡國土爲妙樂土。知善惡性空。故垂誠。則轉善作惡。垂勸。則轉惡作善。知色空不二。故爲著有者。令見色爲非色。爲著空者。令見非色爲色。知男女無眞實相。故應以女身得度。則以男爲女。應以男身得度。則以女爲男。乃至隨意轉現。如維摩室中天女等。知凡聖平等。故應從聖解得度。則以六道爲非六道。應就凡情解脫。則以非六道爲六道。知四大無性。本如來藏。故乃至

地水火風非地水火風是人爾時以大方便力觀一切衆生界卽是佛界隨舉一法皆見其不可思議舉足下足下地莫知乃至不可說不可說法門現在前行所以亦名難勝亦名慧照也。

⑧六華光地

若佛子。菩提薩埵體性華光地能於一切世界中。十神通明智品以示一切衆生種種變化。以天眼明智知三世國土中微塵等一切色分分成六道衆生身。一一身微塵細色成大色分分知。以天耳智知十方三世六道衆生苦樂音聲。非非音非非聲。一切法聲。

以天身智知一切色色非色非男非女形於一念中。徧十方三世國土劫量大小國土中微塵身。以天他心智知三世衆生心中所行。十方六道中一切衆生心心所念苦樂善惡等事。以天人智知十方三世國土中一切衆生宿世苦樂受命。一一知命續百劫。以天解脫智知十方三世衆生解脫斷除一切煩惱若多若少。從一地乃至十地滅滅皆盡。以天定心智知十方三世國土中衆生心定不定非定非不定起定方法。有所攝受三昧百三昧。以天覺智知一切衆生已成佛未成佛乃至一切六道人心心亦知十方佛。

心中所說法。以天念智知百劫千劫大小劫中一切衆生受命命久近。以天願智知一切衆生賢聖。十地三十心中。一一行願。若求苦樂若法非法一切求。十願百千大願。品具足。是人住地中。十神通明中。現無量身心口別用。說地功德百千萬劫不可窮盡。而爾所釋迦略開神通明品。如觀十二因緣品中說。

十通智品起種種用。故名華光。無爲真如性淨明露。故名現前。繇真性現前。遂得十通成就。妙華光明。以自莊嚴也。非非音非非聲者。指無情聲一切法聲者。指出世音滅滅皆盡者。位位斷惑究竟皆

盡。非定非不定者。所謂不起滅定。現諸威儀。有所攝受三昧者。謂三昧各有種種功用。六道人心心者。謂人心中具有佛心。若求苦樂若法非法者。凡夫求苦。聖人求樂。凡求非法。聖人求法。又願生濁世。是求苦。願生淨土。是求樂。願現善道。是求法。願現惡趣。是非法也。此十通亦止。是六通開出。天身智。還屬天眼。眼見色相。分分差別。身知色相。無差別也。天人智。天念智。同屬宿命。天人智。知衆生宿命差別。天念智。知劫數增減差別也。天解脫智。卽漏盡通。天定心智。天覺智。天願智。並屬他心。皆如

文可知。

⑦七滿足地

若佛子。菩提薩埵滿足體性地。入是法中。十八聖人智品。下地所不共。所謂身無漏過。口無語罪。念無失念。離八法。一切法中捨。常在三昧。是入地六品具足。復從是智生六足智。三界結習畢竟不受故。欲具足一切功德。一切法門所求滿故。進心足。一切法事。一切劫事。一切衆生事。以一心中一時知故。念心足。是二諦相。六道衆生一切法故。智慧足。知十發趣人。乃至一切佛無結無習故。解脫足。見一切衆生。知他人

自我弟子無漏無諸煩惱習故。以智知他身六通足。是人入六滿足明智中。便起智身。隨六道衆生心行。口辯說無量法門品。示一切衆生故。隨一切衆生心行。常入三昧。而十方大地動。虛空化華。故能令衆生心行。以大明具足。見過去一切劫中佛出世。亦是示一切衆生心。以無著智。見現在十方一切國土中一切佛。一切衆生心。心所行。以神通道智。見未來中一切劫一切佛出世。一切衆生從是佛受道聽法故。住是十八聖人中。心心三昧。觀三界微塵等色。是我故身。一切衆生是我父母。而今入是地中。一切功德一

切神光。一切佛所行法。乃至八地九地中一切法門。品我皆已入。故於一切佛國土中。示現作佛。成道。轉法輪。示入滅度。轉化他方。過去來今一切國土中。

具足十八不共之法。盡真如際。故名滿足。亦名遠行地也。八法者。利衰苦樂稱譏毀譽。亦名八風。一切法中捨者。亦名無不知已捨。此須四句分別。謂不知不捨。知而不捨。不知而捨。知已而捨。凡夫於一切法。不了元繇。妄想執著。是不知不捨。解行菩薩。雖知諸法真實之相。惑種未斷。未能脫然永離。是知而不捨。二乘無差別智。不知諸法種種體性。

但能永無貪著。是不知而捨。惟佛究盡諸法實相。如圓鏡照物。了了現前。永無粘著。是無不知已捨也。常在三昧者。卽四威儀中無不定心。欲具足亦名欲無減。結習都盡。而常欲度生也。進心足。亦名精進無減。任運度衆生也。念心足。卽念無減。智慧足。卽慧無減。開化衆生。總不出真俗二諦。依於二諦。作隨智隨情等說。具足一切法品。開化六道也。解脫足。卽解脫無減。智知他身六通足。卽解脫知見無減。謂佛於一切解脫中。知見明了。分別無礙也。便起智身等。是一切身業。隨智慧行。口辯說等。

是一切口業隨智慧行。隨衆生心行等。是一切意業隨智慧行。能令衆生心行者。今是轉化之義。以大明具足等。是智慧知過去世無礙。以無著智等。是智慧知現在世無礙。以神通道智等。是智慧知未來世無礙。過去名大明。無昏昧忘失故。現在名無著。如鏡普照故。未來名神通。不可思議故。實則三世皆大明。皆無著。皆是神通道力也。從此數數示成八相。轉化十方三世。無所不徧。名爲滿足。亦名遠行。不亦宜乎。

辛八佛吼地

若佛子。菩提薩埵佛吼體性地。入法王位三昧。其智如佛。佛吼三昧故。十品大明空門。常現在前。華光音入心三昧。其空慧者。謂內空慧門。外空慧門。有爲空慧門。無爲空慧門。性空慧門。無始空慧門。第一義空慧門。空空慧門。空空復空慧門。空空復空空慧門。如是十空門。下地各所不知。虛空平等地。不可說不可說。神通道智。以一念智。知一切法。分分別異。而入無量佛國土中。一一佛前。諮受法。轉法度與一切衆生。而以法藥。施一切衆生。爲大法師。爲大導師。破壞四魔法身具足。化化入佛界。是諸佛數。是諸九地十地。

數中長養法身。百千陀羅尼門。百千三昧門。百千金剛門。百千神通門。百千解脫門。如是百千虛空平等門中而大自在。一念一時行。劫說非劫。非劫說劫。非道說道。道說非道。非六道衆生說六道衆生。六道衆生說非六道衆生。非佛說佛。佛說非佛。而入出諸佛體性三昧中。反照順照。逆照前照。後照。因照果照。空照。有照。第一中道義諦照。是智惟八地所證。下地所不及。不動。不到。不入。不生。不滅。是地法門品。無量無量不可說不可說。今以略開地中百千分一毛頭許事。羅漢品中已明。

一真如心。故名不動。與佛同體。從勝定出。復名佛吼。證於平等法性。真無生忍。故名入法王位三昧。華光音者。諸佛七勸之音。具如華嚴第八地中所明。本從七勸起定。而言入心三昧者。既受諸佛加被。方證一心妙用。出入無非三昧也。空慧者。慧卽大明之體。繇真實慧證法性空。故名大明空門。內空者。觀內色淨相不可得。外空者。觀外色淨相不可得。有爲空者。五陰法中。我所不可得。無爲空者。對有爲說。無爲有爲。既空。則無爲亦不可得。性空者。有爲無爲。皆無自性。無始空者。世間衆生無

有始相第一義空者。諸法中最上第一。名爲涅槃。而亦無相。空空者。第一義雖空。能空之理猶在。今能空亦空。空空復空者。空理雖空。空理之智猶在。今空空之智亦空。空空復空空者。理智皆空。空空之空猶在。今空空復空亦空。是諸佛數者。已證法身。墮在佛位。九地十地。不過任運長養其法身耳。陀羅尼。此翻總持。總一切法。持一切義。依此能發無礙辯才。反照者。內照身心。順照者。觀流轉門。逆照者。觀還滅門。前照者。觀於過去。後照者。觀於未來。因照者。照諸法因。果照者。照諸法果。空照者。照

於眞諦。有照者。照於俗諦。第一中道義諦。照者。照於中諦。不動者。攀緣永息。不到者。言思路絕。不出者。無不照時。不入者。非入定照。不生者。照性無生。不滅者。照性無滅。羅漢品者。結略指廣。此地永捨藏識之名。亦名阿羅漢位。而界內界外。義類不同。若欲委知。須閱四教儀集註。

辛九華嚴地

若佛子。菩提薩埵。佛華嚴體性地。以佛威儀。如來三昧自在。王王定。出入無時。於十方三千世界。百億日月。百億四天下。一時成佛。轉法輪。乃至滅度。一切佛

事以一中一時示現一切衆生一切色身八十種好三十二相自在樂虛空同無量大悲光明相好莊嚴非天非人非六道一切法外而常行六道現無量身無量口無量意說無量法門而能轉魔界入佛界佛界入魔界復轉一切見入佛見佛見入一切見佛性入衆生性衆生性入佛性其地光光照慧慧照明燄明燄無畏無量十力十八不共法解脫涅槃無爲一道清淨而以一切衆生作父母兄弟爲其說法盡一切劫得道果又現一切國土爲一切衆生相視如父如母天魔外道相視如父如母住是地中從生死際起至金剛際以一念心中現如是事而能轉入無量衆生界如是無量略說如海一滴。

以佛莊嚴而自莊嚴名佛華嚴發真如用善能說法故又名善慧地也自在王王定者此自在王三昧爲一切三昧中王也卽出卽入卽入卽出乃至東方入定西方起等故名出入無時一切佛事以一中一時示現者謂不惟次第示成八相又相相之中互具八相所謂或見住胎或見初生或見出家乃至或見已涅槃等其地光者指其光明之體光光照慧慧照者明其無盡無盡明燄明燄者

顯其互徹互融。一念心中現如是事者。所謂始終不出剎那際三昧。轉入無量衆生界者。謂普於一切世界現凡現聖也。餘悉如文可知。

⑩十入佛界地

若佛子。菩提薩埵入佛界體性地。其大慧空空復空空。復空如虛空。性平等智。有如來性。十功德品具足。空同一相。體性無爲。神虛體一。法同法性。故名如來。應順四諦二諦。盡生死輪際。法養法身無二。是名應供。徧覆一切世界中一切事。正智聖解脫。智知一切法有無。一切衆生根故。是正徧知。明明修行。佛果時

足故。是明行足。善逝三世佛法。法同先佛法。佛去時善善來時善善。是名善善。是人行是上德。入世間中教化衆生。使衆生解脫。一切結縛故。名世間解脫。是人一切法上。入佛威神儀形。如佛大士行處。爲世間解脫。調順一切衆生。名爲丈夫。於天人中教化。一切衆生。諮受法言。故是天人師。妙本無二。佛性玄覺。常常大滿。一切衆生禮拜故。尊敬故。是佛世尊。一切世人諮受奉教。故是佛地。是地中一切聖人之所入處。故名佛界地。爾時坐寶蓮華上。一切與授記歡喜。法身手摩其頂。同見同學菩薩。異口同音讚歎無二。又

有百千億世界中一切佛一切菩薩一切雲集請轉
不可說法輪虛空藏化導法門是地有不可說奇妙
法門品奇妙三明三昧門陀羅尼門非下地凡夫心
識所知惟佛佛無量身口心意可盡其源如光音天
品中說十無畏與佛道同

受佛職位墮在佛數故名入佛界地慈陰妙雲覆
涅槃海故亦名法雲地前八地中第十空門名爲
空空復空空慧門今并此大慧而復空之證如虛
空性平等智故得十號功德皆悉具足也空同一
相等者真空之智與實相之理無二其體性卽是

無爲其神虛通其體一實此三句明於如義所有
一切諸法無不皆同法性此句明於來義應順四
種四諦及眞俗二諦盡二種生死之輪際法養之
智與法身之理無二此則恆受第一法供養樂名
應供也正智者卽根本智聖解脫智者卽差別智
根本卽正義差別卽徧義明明者上明字是始覺
下明字是本覺始覺合本故曰明明修者稱性力
用行者性具功德從性起修以修顯性故曰修行
初地分證今歸究竟故稱爲足善逝三世佛法者
逝是入義法同先佛法佛者謂雖應化無方而其

儀則軌式。皆同先佛法身無二。或示入涅槃爲去。或示生人世爲來。無不契理。契機是故善而又善。問理無來去。來去隨機。但可契機。那云契理。答理無來去。亦無不來不去。但令契機。卽是契理。又示來示去。故契機。來無來相。去無去相。故契理也。若藏教菩薩。惟能來度衆生。不能去至涅槃。縱令契機。終不契理。若二乘之人。惟能去至涅槃。不能來度衆生。縱令契理。終不契機。若奪而言之。旣不契理。亦不契機。不能接界外機。故旣不契機。亦不契理。以未達無住涅槃。惟證偏空。不盡理性故。又權

教大士。雖徧能示去示來。但出假須起空。入空須棄假。亦不得名善善。今不起滅定。現諸威儀。四威儀中。心常在定。如明月之在天。水清影現而非來。水濁影亡而非去。乃名去來皆善善也。大士行處。爲世間解脫。應云爲無上士。文錯誤耳。妙本無二者。謂始覺妙合本覺。而無有二。常常大滿者。所謂究竟滿足。一切世人。諮受奉教。故是佛地者。謂此地。自下地視之。亦名爲佛。是一切聖人之所入處。故名佛界地者。謂此地。乃是成佛近因。亦復名菩薩也。爾時坐寶蓮華等。是初登此地。正受佛職事。

又有百千億等。是既受佛職後事。是地有不可說等。是結顯德業。如光音天品下。結略指廣。

①三付囑。引傳二。初舍那付囑。二釋迦引傳。②

初中之。初結示付囑。二放光付囑。③今初

爾時盧舍那佛爲此大衆略開百千恆河沙不可說法門中心地如毛頭許。是過去一切佛已說。未來佛當說。現在佛今說。三世菩薩已學當學。今學。我已百劫修行是心地。號吾爲盧舍那。汝諸佛轉我所說。與一切衆生開心地道。

本源心地。一切衆生之所共有。但無明障蔽。久成

閉塞。今轉此法門。令得開發。故云開心地道也。

④二放光付囑

爾時蓮華臺藏世界赫赫天光師子座上盧舍那佛放光。光告千華上佛。持我心地法門品而去。復轉爲千百億釋迦及一切衆生次第說我上心地法門品。汝等受持讀誦。一心而行。

既結示付囑。復放光普告者。止顯心地法門。若本若迹。若因若果。無不以智爲前導也。故始則釋迦放光。發起表本覺之性明。能熏始覺。次則菩薩放光。集衆表始覺之智德。能尋本覺。今則舍那放光。

囑授表於從果起因。妙彰理本。後復釋迦放光誦戒。表於即因成果。善修事迹。光光互映。了知始本不二。修性同源矣。

⑤二釋迦弘傳三。初受法將辭。二旋歸本界。三遵勅利生。⑥今初

爾時千華上佛。千百億釋迦。從蓮華臺藏世界赫赫。師子座起。各各辭退。舉身放不可思議光。光皆化無量佛。一時以無量青黃赤白華。供養盧舍那佛。受持上說心地法門品竟。

舉身放不可思議光者。迹光與本光無異。同是三德秘藏。微妙智明也。光皆化無量佛者。此智是諸佛之母。諸佛繇此而出生也。無量華供養者。華表妙因。妙因從果德起。還用莊嚴果德也。

⑥二旋歸本界

各各從此蓮華臺藏世界而沒。沒已入體性虛空。華光三昧。還本源世界。閻浮提菩提樹下。從體性虛空華光三昧出。

三昧名體性虛空華光者。謂徹證本來如虛空之體性。則華光任運自現。體性即法身德。華即表解脫德。光即表般若德也。還本源世界。閻浮提菩提

樹下者。若據下卷初文。應云還至四禪摩醯首羅天王宮。先說魔受化經。方乃下生人間。示現出家。詣菩提樹。今徑明菩提樹下。從三昧出。正顯八相成道。始終皆不離此三昧也。又前接至華藏。既稱爲還。今復至南洲。亦名還本源世界者。前表理爲事本。今表事爲理本。故皆得稱還。稱本源也。何謂理爲事本。謂本惟圓教一實之理。而衆生迷有深淺。悟有難易。故更設別教通教藏教以開示之。又本惟一行是如來行。而衆生根有利鈍。修有巧拙。故更立五行萬行等以收羅之。又本惟眞常法身

而衆生久在輪轉。不能自見。故更現勝應劣應等身以覺悟之。又本惟寂光淨土。而衆生違背日久。證入無繇。故更垂實報方便同居等土以攝受之。是名理爲事本也。何謂事爲理本。謂只此因緣生法。此法卽空卽假卽中。總不得離此。正因緣境而別談理性。又只此施戒等行。或達其三輪體空。或知其莊嚴無盡。或了其體是法界。總不得廢此六度事行而高談理觀。又只此丈六常身。名爲境本。定身界內利根。卽見其坐天衣座。轉無生四諦法輪。界外鈍根。卽見其相好無量。徧坐道場。界外利

根卽見其一。一色相。當體無非真實法身。故法華經云。微妙淨法身。具相三十二。何處別有四佛。爲四人說四教耶。又只此同居一土。斷見思者。便能橫見方便。破無明者。便能橫見實報。無明盡者。便能橫見寂光。方便一土。猶可云別在界外。實報寂光。則未有隔於此土者。是名事爲理本也。

②三遵勅利生。又二初。且明一界佛。二例結餘界佛。庚今初

出已。方坐金剛千光王座。及妙光堂。說十世界海。復從座起。至帝釋宮。說十住。復從座起。至燄天。中說十

行。復從座起。至第四天。說十迴向。復從座起。至化樂天。說十禪定。復從座起。至他化天。說十地。復至一禪中。說十金剛。復至二禪中。說十忍。復至三禪中。說十願。復至四禪中。摩醯首羅天王宮。說我本源蓮華臺藏世界盧舍那佛所說心地法門品。


方者。正也。安住正法。故云方坐也。金剛千光王座。下卷名華光王座。千字卽華字之誤。金剛表法身德。華表解脫。光表般若。全以三德秘藏正法而爲其座也。妙光堂。卽普光明殿。華嚴七處九會多云。不起本處。此云復從座起。機宜不同。所見各別。略

如玄義中辨。帝釋宮。卽忉利天宮。在須彌山之頂。此云三十三天。以四方各八天。臣并中間天主。爲三十三。燄天亦云夜摩天。此云時分。不假日月光。明。但以蓮華開合分晝夜故。第四天。卽兜率陀天。此云知足。生此天者。於五欲皆知足故。中有內院。卽一生補處所居。復至四禪。乃說此心地法門者。本從四禪中放光發起。接至華藏世界。兼受此法。故今仍於四禪說之。又帝釋宮等。分說此心地法。四禪宮中。合說此心地法。分說表於行布。合說表於圓融。又顯此心地法。雖位位差別。總趣極果也。

庚二例結餘佛界

其餘千百億釋迦亦復如是。無二無別。如賢劫品中說。

佛說梵網經菩薩心地品合註卷第二



佛說梵網經菩薩心地品合註卷第三 下卷初

姚秦三藏法師鳩摩羅什譯

明菩薩沙彌古吳智旭註

菩薩比丘溫陵道昉訂

丙次釋迦宣菩薩戒三初敘說戒原繇二例重輕

戒相三勸大眾奉行丁初中二初覆敘垂迹

傳法二正明樹下勸發戊初中又二初長行

次偈頌己初中復二初正述迹佛弘法二方

明以戒攝生

庚今初

爾時釋迦牟尼佛。從初現蓮華臺藏世界。東方來入天王宮中。說魔受化經已。下生南閻浮提。迦夷羅國。母名摩耶。父字白淨。吾名悉達。七歲出家。三十成道。號吾爲釋迦牟尼佛。於寂滅道場。坐金剛華光王座。乃至摩醯首羅天王宮。其中次第十住處所說。時佛觀諸大梵天王。網羅幢。因爲說無量世界。猶如網孔。一一世界。各各不同。別異無量。佛教門亦復如是。吾今來此世界。八千返。爲此娑婆世界。坐金剛華光王座。乃至摩醯首羅天王宮。爲是中一切大眾。略開心地法門竟。

從初現蓮華臺藏世界者。指上卷初於四禪天中放光徹照。乃至擎接還歸事也。東方來入天王宮者。謂既秉受心地法門。入體性虛空華光三昧。卽於三昧之中。還來此土摩醯首羅天王宮中。此土在華藏之東。故云東方來入也。說魔受化經者。別爲通教利根。示現於第四禪天降魔已竟。方更下生。如玄義中所明。不同三藏所見。直至樹下方降魔也。迦夷羅。亦云迦維羅衛。其云迦毘羅。譯都。翻爲黃色所依處。上古有黃頭仙人。依此修道。西域記云。劫比羅伐罕堵。此翻赤澤。或名娑兜釋翅。

搜。或名釋翅瘦。此翻能仁住處。摩耶具云摩訶摩耶。此翻大術。或翻大幻。謂以大願智幻法門。爲如來母也。白淨。或云淨飯。或云眞淨。梵稱首圖馱那。或稱閻頭檀也。悉達。具云薩婆悉達。此翻頓吉。以太子生時。諸吉祥瑞皆悉具故。大論翻爲成利。西域記云。薩婆曷刺他悉陀。唐言一切義成。舊稱悉達。訛略也。七歲出家。猶言出家七歲。謂初出家時。先學不用處定。不久得證。知非究竟。次學非非想定。又不久得證。知其亦非究竟。次復遊行諸國。凡經一年。次更苦行六年。至年三十。乃成正覺。齊此

以前皆是體性虛空華光三昧中事。示成佛已。名爲從三昧出。卽坐金剛華光王座。及妙光堂。說十世界海。次復徧歷忉利夜摩兜率化樂他化初禪二禪三禪。及摩醯宮。其有十箇住處。說於十種法門。說法已周。更爲說喻。令知所被之機。能被之教。皆如梵網。皆不出於心地法門也。寂滅道場。卽菩提道場。菩提是智。寂滅是理。繇坐此處。以菩提智證寂滅理。故名爲菩提道場。亦名寂滅道場。來此世界八千返者。特指示成正覺之事。非謂其餘化身。如玄義中已明。略開心地法門竟者。結指上文。

庚二方明以戒攝生

復從天王宮。下至閻浮提菩提樹下。爲此地上一切衆生。凡夫癡暗之人。說我本盧舍那佛心地中。初發心中常所誦一戒。光明金剛寶戒。是一切佛本源。一切菩薩本源。佛性種子。一切衆生皆有佛性。一切意識色心是情是心。皆入佛性戒中。當當常有因故。當當常住法身。如是十波羅提木。又出於世界。是法戒。是三世一切衆生頂戴奉持。吾今當爲此大衆重說無盡藏戒品。是一切衆生戒。本源自性清淨。

十會既畢。隨說戒品者。以此住行向地等一切微

妙法門。雖人人性具。而沈迷日久。方坐癡暗之地。何繇得入。然雖癡暗。凡夫亦自有入門方便。只恐不發心耳。只如盧舍那佛。本亦曾爲癡暗凡夫。但初始發心。便受戒品。受戒之後。便常誦習。所以克證心地法門。直至成佛。皆以此一戒爲最勝因緣。此戒是古先諸佛展轉相傳。非是創立。卽是第一最上微妙之戒。破諸黑暗。名爲光明。摧諸煩惱。喻若金剛。廣具一切功德法財。目之爲寶。又照一切法。名爲光明攝善戒也。體是無漏。名爲金剛律儀戒也。濟物利用。名之爲寶攝生戒也。蓋不惟舍那

繇此成佛。舉凡一切諸佛。無不以此戒爲本源。一切菩薩。亦無不以此戒爲本源。以離此戒。則三十二心十地法門。皆不成就。乃至佛地一切功德。亦不成就。故也。佛性種子者。此戒本以正因佛性爲種子。起信所謂以知法性無染汙故。隨順修行尸波羅密。而緣了佛性。又以此戒爲種子。涅槃所謂一切衆生。雖有佛性。要因持戒。然後乃見。因見佛性。乃成阿耨多羅三藐三菩提也。一切衆生。既皆有佛性。佛性徧一切法。則若意若識。若色若心。但凡是情是心。無不入於佛性戒中。此戒的的。是常有。

真因。此戒的的。是常住法身妙果。如是十波羅提木。又出於世界。普被羣機。故此法戒。乃三世一切衆生。皆應頂戴受持者也。思量名意。別指第七。了別名識。別指前六。集起名心。別指第八。五根四大名色。是情者。揀非無情。是心者。揀非無心。謂除非木石無心。不堪受戒。但有心者。皆有佛性。有佛性者。卽入佛性戒中。以此妙戒。全依佛性理體所起。還復開顯佛性。莊嚴佛性。故名佛性戒也。當當猶言的的確確。既是全性所起。的是常有真因。既繇此開顯莊嚴佛性的。是常住法身妙果。所謂十無。

盡戒。一切戒之根本。保任行人到解脫岸。故名波羅提木叉。此戒卽是無盡之藏。繇於本源自性清淨爲所依體。迺成無作妙戒體故。出此無作戒體。復爲三意。初正出無作律儀。二兼明定道二戒。三更明三聚戒法。初正出無作律儀者。天台師云。戒體者不起而已。起卽性。無作假色。譬公釋云。謂此戒體不起則已。起則全性。而性修交成。必無作假色。假色者。性必假色法。以爲表見也。無作一發。任運止惡。任運行善。不俟再作。故名無作。此菩薩無作律儀。應以七句勝義而詮顯之。一者本

源清淨以爲其性。二者增上善心以爲其因。三者三種勝境以爲其緣。四者三番羯磨以爲其體。五者無漏妙色以顯其相。六者極至佛果以爲其期。七者妙極法身以爲其果。一清淨爲性者。所謂諸法真實之相。不生不滅。不常不斷等。乃此戒所依之理體也。二增上因心者。所謂發菩提心。被四弘鎧。上求下化。情期極果。又須別圓二教初心。乃感此戒。若藏通二教之心。不能發此無上戒也。三勝境爲緣者。瓔珞經云。諸佛菩薩現在前受名上品戒。菩薩法師前受名中品戒。千里無師。於經像前

自誓而受。名下品戒。自誓受戒。復有不同。此經卽須得見好相。瓔珞地持。皆惟貴發菩提心。或重內因。或重外緣。各有所以。須自審量耳。四從羯磨得者。磬公云。初番羯磨時。十方世界妙善戒法。緣心業力。悉皆震動。二番羯磨時。十方世界妙善戒法。如雲如蓋。覆行人頂。三番羯磨時。十方世界妙善戒法。從行人頂門。流入身心。充滿正報。盡未來際。永爲佛種。義疏云。大乘所明戒。是色聚。憑師一受。遠至菩提。隨定隨道。誓修諸善。誓度含識。以情期極果。此心力大。別發戒善。爲行者所緣。止息諸惡。

涅槃經念戒中云。雖無形色。而可護持。雖無觸對。善修方便。可令具足。故知別有此無作體。從羯磨得。若自誓受者。亦從三白時得。或從見好相時得也。五無漏色相者。謂初受戒竟。卽於法界有情邊得不殺色。於法界情非情邊得不盜色。於法界有情邊得不婬色。於法界有情邊得不妄語色。乃至於法界有情邊得不瞋色。於法界三寶邊得不謗色。又衆輕戒中。於法界師友邊得不慢色。於法界酒得不飲色。於法界肉得不食色。乃至於法界法門得不破壞色。此不殺不盜等法。雖無形相可見。

而借色表顯。所謂非眼處色。是法處色。又殺盜等是有漏法。不殺等即無漏法。故名無漏色法。是以未受戒時。雖殺盜等事。未必念念徧造。而十方世界無非我殺盜淫妄之場。十方有情無非我殺盜淫妄所行之境。甫受戒已。則十方世界無非我慈良清直之地。十方有情無非我慈良清直所被之機。故一念中成就無漏微妙善色。一一徧於法界。一切諸念亦復如是。名為無盡戒品。不亦宜乎。六佛果為期者。瓔珞經云。從今身至佛身。於其中間不得故殺生。乃至不得故謗三寶藏。菩薩戒羯磨

文云。若諸菩薩。雖復轉身徧十方界。在在生處。不捨菩薩淨戒律儀。設轉受餘生。忘失本念。值遇善友。為欲覺悟菩薩戒念。雖數重受。而非新受。亦不新得。不同其餘戒法。惟以盡壽為期也。七妙極法。身果者。據義疏論。興廢中。謂方便求受。其體則興至佛乃廢。以佛果位中。諸惡永淨。更無可止。萬善圓極。更無可行。持犯兩忘。故名為廢。然此無作戒體。既是全性起修。寧不全修在性。既全在性。那可論廢。又既是無漏色法。即是諸佛究竟常色。又安可廢。若戒體可廢。定慧解脫。解脫知見。亦應可廢。

又盧舍那名淨滿。惡無不淨。善無不滿。正是究竟戒體。故曰惟佛一人持淨戒。其餘皆名破戒者。又豈有廢。然此戒體。雖至佛地。乃稱究竟。而初心所受。更無異體。故曰若人受佛戒。卽入諸佛位。以與三世諸佛同一戒體故也。如太子初生。卽入王位。位同於王。真是王子。雖治國平天下事。尚未諳練。不得言其非是王種。菩薩受戒。亦復如是。頓同諸佛戒體。名真佛子。雖定慧解脫力無畏。不共法等。尚未修習。不得言其非是佛種。如太子長成。紹繼王位。止是父母所生之身。更無異身。菩薩成佛。亦

復如是。功德滿足。坐於道場。止是初發心時所得戒體。更無異體。如此妙體。那得論廢。如太子生後。若壽命應盡。若九橫因緣。其身則死。不復堪能紹繼王位。菩薩受戒。亦復如是。若退失大菩提心。若毀犯十重禁法。其戒則失。不復堪能成就菩提。防此二緣。善巧修習。直至菩提。成究竟戒。故言妙極。法身以爲果也。二兼明定道二戒者。大小乘中。皆有定其戒。及道其戒。謂繇定力。自然止息諸惡。名定其戒。繇於道力。自然永離諸惡。名道其戒。定道與律儀並起。故稱爲共。前明律儀從師受得。今

則藉定道力。自能發得無作律儀。還以無作為其體也。此定道二戒。若先已受律儀戒者。止因定道。倍增明淨。更無異體。若先未受律儀戒者。隨定道力。卽發律儀。又定其亦名禪戒。道共亦名爲無漏戒。或定共通於欲界地定。禪戒惟指初禪已上。道共通於方便道中。無漏惟指發真已上。若發真無漏。則永無退失。若方便道及諸禪定。容有進否也。

三更明三聚戒法者。瓔珞經云。律儀戒。謂十波羅夷。攝善。謂八萬四千法門。攝生。謂慈悲喜捨。化及衆生。令得安樂。今明此三。並是菩薩戒法。亦並

以無作為體。律儀備列重輕諸相。而止言十波羅夷者。以四十八輕。皆是十重戒之等流眷屬。十重戒法。攝一切戒罄無不盡。是故名爲十無盡戒也。八萬四千法門。卽無作體所具衆善。慈悲喜捨。卽無作戒妙用功能。所以同名爲戒。又菩薩戒法。弘誓無盡。若不攝善攝生。卽是戒體有缺。故八萬四千法體。慈悲喜捨。定體總皆攬之。以爲戒體。戒爲法界。一切法趣戒也。律儀戒是法身德。攝善戒是般若德。攝生戒是解脫德。攝律儀能成法身。攝善法能成報身。攝衆生能成化身。又繇律儀戒成於

斷德。繇攝善戒成於智德。繇攝生戒成於恩德。小
乘心希自度。見苦斷集。故但有律儀。不慕佛地。稱
性功德。故無攝善法戒。不思濟度一切衆生。故無
攝衆生戒。菩薩初發心時。便以上求下化爲懷。上
求攝善。下化攝生。三聚淨戒。一時圓發。更非先後
也。

③次偈頌三。初頌舍那始授。二頌釋迦轉授。三勸
信受奉持。義疏云。三序悉是此土釋迦所說。雜
有經家之辭。庚初頌舍那始授

我今盧舍那。方坐蓮華臺。周匝千華上。復現千釋迦。

一華百億國。一國一釋迦。各坐菩提樹。一時成佛道。
如是千百億。盧舍那本身。千百億釋迦。各接微塵衆。
俱來至我所。聽我誦佛戒。甘露門卽開。

甘露者。不死之藥。喻持戒者。能得涅槃常樂。我淨
永無老死也。門爲能通。教能通理。繇教戒力。通至
大涅槃城。

庚二頌釋迦轉授

是時千百億。還至本道場。各坐菩提樹。誦我本師戒。
十重四十八。戒如明日月。亦如瓔珞珠。微塵菩薩衆。
由是成正覺。是盧舍那誦。我亦如是誦。汝新學菩薩。

頂戴受持戒。受持是戒已。轉授諸衆生。

本師指舍那也。如明日月瓔珞珠者。日消罪霧。月照夜幽。珠療貧窮。律儀義也。日長善法。月得清涼。珠富法財。攝善義也。日月麗天。無不瞻仰。瓔珞在身。觀者愛敬。攝生義也。既勸受持。卽勸轉授。使燈燈相續。化化無盡。

庚 三勸信受奉持

諦聽我正誦佛法中戒藏。波羅提木叉。大衆心諦信。汝是當成佛。我是已成佛。常作如是信。戒品已具足。一切有心者。皆應攝佛戒。衆生受佛戒。卽入諸佛位。

位同大覺已。真是諸佛子。大衆皆恭敬。至心聽我誦。佛法中戒藏者。一乘無上戒法。不但揀異外道。凡夫等戒。亦復揀異聲聞緣覺戒也。此戒卽是諸戒之藏。以一切八戒五戒十戒二百五十戒等。無不從此大戒流出。又一切八戒及具戒等。無不攝入此大戒中。故清淨毘尼方廣經云。菩薩毘尼。猶如大海。所有毘尼。無不納受也。大衆心諦信者。佛法大海。惟信能入。若不信自身。決得成佛。則有所戒品。不能牢固。若諦信自身。有成佛分。諦信舍那。緣戒成佛。自然念念護持妙戒。不使毀缺也。餘如前

釋可知。

⑤二正明樹下勸發二。初經家敘事。二釋迦自說。

⑥初中三。初佛欲結戒。二放光表瑞。三大眾願

聞。庚今初

爾時釋迦牟尼佛。初坐菩提樹下。成無上正覺已。初結菩薩波羅提木叉。孝順父母師僧三寶。孝順至道之法。孝名為戒。亦名制止。

上文言示成佛道十處說法已竟。復至菩提樹下說戒。今言初坐等者。意顯成道不久。即宣此戒。非待他時。所謂先務之為急也。初結木叉。頓制五十

八事。不同聲聞隨犯隨結者。理論關機宜。事論凡有三義。一者大士深信。頓聞不逆。二者大士不恆侍左右。不得隨事隨白。三者舍那為妙海王子。授菩薩戒。即頓說此五十八條古制。應爾也。又聲聞隨事隨結。皆悉集十句義。今頓制諸戒。亦應戒戒具足十義。經雖不出。理必應然。略出名相。俾知利益。一攝取於僧。謂制此重輕諸戒。攝受眾生。令歸大乘。僧寶數中。令取大乘僧寶果位。二令僧歡喜。謂繇攝取力故。能令大地菩薩歡喜暢悅。三令僧安樂。謂繇禁戒力故。能令菩薩種族利益增長得

安樂住。四未信者令生信。謂繇禁戒力故。性遮清淨發起一切衆生正信之心。五已信者令增長。謂繇清淨律儀能令久淹佛法者。益其堅固不退悔故。六難調者令調順。謂有一類假名菩薩。及一類雖發大心煩惱習强者。今以重輕諸戒調之。懺悔訶責。令不敢違法律故。七慚愧者得安樂。謂繇調順諸難調者。則慚愧僧無擾亂故。八斷現在有漏。謂制止三業十支。令不漏落業煩惱故。九斷未來有漏。謂永斷漏種。不以染汙心受生死故。十正法得久住。謂繇大乘僧寶種性不斷。建立弘通正法。

輪故。孝順父母等者。戒相雖多。孝順攝盡。故總提孝順二字。以爲其宗。父母生我色身。依之修道。師僧生我戒身。繇之成佛。三寶生我慧命。成就菩提。故一一須孝順也。爾雅釋善事父母爲孝。大史叔明以順釋孝。孝卽是順。孝順父母有三差別。一者冬溫夏清。昏定晨省。奉養無方。服勞靡間。二者立身行道。不辱所生。三者善巧方便。喻親於道。孝順師僧。亦應准此。師僧者。獨指授戒之師。其餘僧衆。自屬三寶中攝。孝順三寶。亦有三義。一者供養承事。不厭疲勞。二者如說修行。不汙法化。三者革弊。

防非弘通建立。若約法門解者。方便為父。智度為母。不離深義。以為和尚。自心覺悟名佛。自心理體名法。理智一如名僧。如理作意觀察名孝。如理證入無背名順也。繇斯事理二種孝順。決至無上。大菩提道。故云至道之法。孝即名之為戒。亦即名為制止。以孝則自不作惡故也。

庚二放光表瑞

佛即口放無量光明。

瑞者信也。欲說大事。故放勝光。廣召有緣。同來聽也。口放者。一表此戒金口敷揚。二表受者從佛口

生

庚三大眾願聞

是時百萬億大眾諸菩薩。十八梵天。六欲天子。十六大國王。合掌至心聽佛。誦一切諸佛大乘戒。

百萬億者。總敘有緣同集眾也。諸菩薩別指三十三心十地位人。十八梵天。別指色界。一梵眾。二梵輔。三大梵。此三總名初禪。四少光。五無量光。六光音。此三名第二禪。七少淨。八無量淨。九徧淨。此三名第三禪。十福生。十一福愛。十二廣果。此三屬第四禪。凡夫所居。十三無想。亦屬四禪。外道所居。十四

無煩。十五無熱。十六善見。十七善現。十八色究竟天。此五亦屬四禪。三果聖人所居。此十八天。雖凡聖不同。皆離欲穢。得清淨定。故名梵天。六欲天子。別指欲界。一四王天。二初利天。三夜摩天。四兜率天。五化樂天。六他化自在天。此六欲天。雖尚有男女五欲。而果報自然。不假營求。故皆名天。十六大國王者。西域諸國最多。舉其甚大。有十六國。一史伽。二摩竭提。三迦尸。四拘薩羅。五跋祇。六末羅。七支提。八跋沙。九尼樓。十槃闍羅。十一阿濕波。十二婆蹉。十三蘇羅。十四乾陀羅。十五劍浮沙。十六阿

槃提。合掌者。身業肅恭。至心者。意業專精。聽者。口業寂靜。攝耳諦聽也。

②二釋迦自說三。初舉自誦勸人。二明放光因緣。

三勸大眾習學。庚今初

佛告諸菩薩言。我今半月半月。白誦諸佛法戒。汝等一切發心菩薩。乃至十發趣。十長養。十金剛。十地。諸菩薩亦誦。

半月半月者。望日爲白月。十五晦日爲黑月。十五白表智德漸滿。黑表斷德漸盡。故於此日誦此戒法。名爲布薩。正呼爲褒灑陀。褒灑是長養義。陀是

淨義言長養善法淨除不善也。佛尚自誦何況餘人。佛既自誦益知至佛乃廢之說非盡理矣。

庚二明放光因緣

是故戒光從口出有緣非無因故光。光非青黃赤白黑非色非心非有非無非因果法。是諸佛之本源。行菩薩道之根本。是大衆諸佛子之根本。

初句直說放光之緣。此光卽表無作戒體。此無作戒全以性德爲其本因。故非無因。既是全性所起卽復全體是性。是故非青非黃乃至非因果法。非青黃等色。非分別識心。不墮凡愚妄情妄境界也。

非有非無不墮邪見斷常果也。非因果法。不墮權小有修有證果也。不墮此等諸果。乃是法身妙果。既是法身妙果亦卽成佛真因。故諸佛菩薩大衆佛子皆以此爲本源。

庚三勸大衆習學

是故大衆諸佛子應受持應讀誦應善學佛子諦聽。若受佛戒者國王王子百官宰相比丘比丘尼十八梵天六欲天子庶民黃門姪男姪女奴婢八部鬼神金剛神畜生乃至變化人但解法師語盡受得戒皆名第一清淨者。

領納名受。堅執名持。口演其文爲讀誦。躬行其事爲善學。黃門此云不男。凡有五種。謂生犍。變。妬。半。八部二解。或云一天二龍。三夜叉。四乾闥婆。五阿修羅。六迦樓羅。七緊那羅。八摩睺羅伽。或云四天王各領二部。東方持國天王領乾闥婆及毘舍闍南方增長天王領鳩槃荼及薜荔多。西方廣目天王領龍及富樓那多。北方多聞天王領夜叉及羅刹。金剛神亦名執金剛神。亦名金剛力士。持金剛杵。隨侍諸佛者也。變化人謂天龍等變作人形。解法師語。揀去不解語者。不解則不能發菩提心以

爲勝因。故須揀之。不揀種類。以其同具佛性故也。解則盡受得戒。揀不解者。雖受亦不得也。未受戒前。容有淨穢差別不等。一受此戒。咸成最上法器。故皆名第一清淨也。

丁次列重輕戒法。二初十重。二四十八輕。戊初

中三初總標。二別解。三總結。己今初

佛告諸佛子。言有十重波羅提木叉。若受菩薩戒。不誦此戒者。非菩薩。非佛種子。我亦如是誦一切菩薩已學。一切菩薩當學。一切菩薩今學。已略說菩薩波羅提木叉相貌。應當學。敬心奉持。

十重名波羅提木叉者。犯之則永棄佛海。持之則
保取解脫也。既受須誦。誦則知持。知犯。知輕。知重。
知善護持。不誦則日就遺忘。現在失菩薩之位。將
來失成佛之種。甚明其不可不誦也。相貌者。戒雖
無形。繇持犯而表示。廣即十重四十八輕。略說即
是孝順。若不敬心奉持。便非孝順矣。

②二別解十。第一殺戒。至第十謗三寶戒。

庚第一殺戒。此等皆是後人科文。不宜雜入經文讀誦。

佛言。若佛子。若自殺。教人殺。方便殺。讚歎殺。見作隨
喜。乃至呪殺。殺因。殺緣。殺法。殺業。乃至一切有命者。

不得故殺。是菩薩應起常住慈悲心。孝順心。方便救
護一切衆生。而反自恣心快意殺生者。是菩薩波羅
夷罪。

釋此重輕戒法。須用十門明義。一隨文釋義。二性
遮重輕。三七衆料簡。四大小同異。五善識開遮。六
異熟果報。七觀心理解。八懺悔行法。九修證差別。
十性惡法門。諸條悉具十門。可以意得。不復委標。
惟今初戒總出其意。

初隨文釋義。若佛子者。發菩提心。受菩薩戒。紹佛
家業。住佛律儀。不狂。不亂。不病壞心。不隔他陰。自

知我已受菩薩戒也。若理卽佛子。未秉此戒。無罪可結。止得性罪。若相似分證。究竟佛子。煩惱已斷。永不犯戒。但有清淨戒體。常在今所指者。卽是名。字觀行二種佛子耳。自殺者。或用內色。謂手足等。或用外色。謂刀杖木石等。或雙用內外色。謂手執刀杖等。令前人命斷。名之爲殺。教人殺者。或面教。或遣使。或作書等。方便殺者。卽殺前方便束縛捉繫等。或指示道路。令前人捕獲。亦名方便。讚歎殺者。前人本無殺心。讚譽令起殺心。隨喜殺者。前人先有殺心。獎勸令其成就。乃至呪殺者。作起屍呪。

及伏弩火坑等種種惡事。具如五戒相經廣明。殺因者。心欲前人命斷。殺緣者。方便助成其事。殺法者。刀劍坑弩毒藥呪術等殺業者。前人命根不得相續。乃至一切有命者。下及微細有情。如蜎飛蠕動等。不得故殺者。揀非誤傷。常住者。了知心佛衆生。三無差別。其性常住。慈悲心者。同體大哀。若保赤子。惟思拔苦與樂。孝順心者。尊重佛性。視同父母。不敢輕於一切。方便救護者。慈悲孝順之實事。反者。明其不應。恣心者。因貪起殺。不知制止。快意者。因瞋起殺。洩其怨恨。是菩薩者。繇本受戒。故有。

此名波羅夷罪者。此云棄罪。犯此戒者。永棄佛海邊外。永失妙因妙果。亦云墮罪。犯此戒者。墮落三塗。亦云他勝處法。受菩薩戒。本欲破壞煩惱摧伏魔軍。今犯此戒。反被煩惱所勝。又被魔軍所勝。亦云是極惡法。亦云是斷頭法。亦云如斷多羅樹心。如針鼻缺。如大石破二分等。夫律中明一人受比丘戒。地神空神展轉傳告。頃刻聲徧初禪。魔則震恐。若一人破比丘戒。護身神出。大歎息之聲。亦復展轉傳告。徧於初禪。魔則歡喜。今菩薩戒羯磨文。明一人受戒。則十方佛菩薩前。法爾相現。繇是諸

佛菩薩。憶念憐愍。倘一人破戒。寧不徧令法界聖賢。咨嗟悲悼耶。持戒者審思之。一性遮重輕。此戒具二業成罪。一性業。二遮業。性業者。雖不受佛戒。世間法爾有罪。如輪王十善。亦制殺生。國制殺人。會須償命。遮業者。佛制之所遮止。犯者得破戒罪。此之殺業。不受戒人。但得性罪。已受戒者。兼得性遮二罪也。問。同一殺盜淫妄等事。未受戒人。止得一罪。已受戒人。反得二罪。則受戒乃招罪之途。有損無益。答。受佛戒。卽入佛位。皆名第一清淨功德。豈可思議。惟其持者功德力大。所以破者罪業

倍深。功德力大。必宜承受。罪業倍深。必宜莫犯也。此戒備四緣成重。一是衆生。二衆生想。三有殺心。四前人命斷。一是衆生者。略爲三品。上品謂諸佛聖人。父母師僧。佛不受害。但令惡心出其身血。卽犯逆罪。害羅漢。犯逆。害三果以下。但犯重。菩薩取發趣以上。害者犯逆。害外凡位未入畢定性者。但犯重。殺父。殺母。殺和尚。殺阿闍梨。尙犯逆罪。中品謂一切人天。害皆犯重。下品謂四趣衆生。修羅鬼神畜生等。此有兩解。一云同重。大士防殺嚴故。文云一切有命者不得故殺。卽其證也。二云但輕垢

在重戒中兼制。以非道器故。文云有命者。舉輕况重耳。今更推詳其致。比丘戒法局在人倫。故謂餘趣非器。殺天亦止結輕。今菩薩戒法全收五道。則鬼神畜生咸堪載道。害心斷命。那得結輕。然使故殺一蚊蚋等。便成重罪。便失菩薩無上律儀。則害及人天者。又將以何罪判之。若以義斟酌。畜生等解語受戒者。害則犯重。不解語者。害則犯輕。又菩薩重戒有二分別。一失戒。二不失戒。害人天等。犯重。失戒。害蚊蚋等。但犯重罪。不失戒體。或數數故傷。都無慚愧。煩惱增上。不知厭捨。亦可失戒也。二

衆生想者。有當。有疑。有僻。共成六句。謂實是衆生。實衆生想。實非衆生。非衆生想。二句爲當。實是衆生。心中疑爲是衆生耶。非衆生耶。實非衆生。心中疑爲是衆生耶。非衆生耶。二句爲疑。實是衆生。心中決謂非衆生想。實非衆生。心中決謂是衆生想。二句爲僻。若衆生。衆生想。衆生疑。殺者犯重。若衆生。非衆生想。如見蛇。誤以爲繩。見蟲。誤以爲土。雖斫之。捨之。本無殺心。無犯戒罪。若非衆生。作衆生想。及疑。如見繩。誤以爲蛇。見土。誤以爲蟲。斫之。捨之。雖無所害。具有殺心。犯輕垢罪。若非衆生。非衆

生想。此全無罪。又聖人。聖人想。父母。父母想。師僧。師僧想。人。天人。天想等。各有六句。結判逆與非逆。若重若輕。可以例知。三殺心者。謂惱害前境。願其命斷。正是業主。繇此惡心。或自身行殺。或教他遣使等。殺心復二。一通心。二隔心。通心者。如漫作坑。弩漫爲燒。斫。隨有死者。皆悉犯罪。都無死者。犯方便罪。亦名不遂。輕垢。隔心者。本爲此人。作殺方便。誤傷彼人。於彼人都無殺心。故不結罪。仍於此人。邊結方便罪。四前人命斷者。色心連持。相續不斷。名爲命根。今使不得相續。故成殺業。此有兩時。一

者於現生中見彼命斷。二者作殺方便已先自捨命。彼方命斷。現生見彼命斷。復有二句。一者自身有戒。二者自身捨戒。若有戒時。前人命斷。結重。若捨戒後。前人命斷。止於捨戒之前。結方便罪。後命斷時。不復結罪。但有世間性罪也。先自捨命。彼方命斷。復有兩種。一者後生自憶宿命。二者不憶。若自憶宿命者。彼人或任勢命斷。或更加方便令斷。皆結重罪。若不憶宿命者。彼人任勢命斷。結重。以菩薩死後。戒體不失。故或更加方便令斷。當知不因前方便死。但結輕垢。後加方便。繇夙業牽。不自

憶知。譬如比丘癡狂。心亂及病壞心。故不犯也。又菩薩未登不退。或繇業報。因緣得癡狂。心亂等病。當知有五因緣。令狂病生。一親里死盡。故狂。二財物失盡。故狂。三田業人民失盡。故狂。四或四大錯亂。故狂。五或先世業報。故狂。有五因緣。令心散亂。一爲非人所打。故心散亂。二或非人令心散亂。三或非人食心精氣。故心散亂。四或四大錯。故心散亂。五或先世業。故心散亂。有五因緣。令心病壞。或風發。故病壞心。或熱發。故病壞心。或冷發。故病壞心。或三俱發。故病壞心。或時節氣發。故病壞心。雖

有如是狂亂等病。若自覺是受菩薩戒者。殺心害命。仍犯重罪。若見火而捉。如金無異。見屎而捉。如梅檀無異。如是狂亂。都不自憶。有菩薩戒。犯戒無罪。若菩薩未狂亂時。作殺方便。狂亂之後。彼人命斷。犯重。若菩薩狂亂時。作殺方便。得本心後。彼人命斷。無犯。若得本心後。更加方便。令命斷者。犯重。又菩薩本所受戒。極至佛身。捨身他世。戒體不失。若憶知宿命。作殺生者。犯重。若不憶宿命。雖作殺生。不名犯戒。與狂亂心壞同科。三七衆料簡。七衆者。一比丘衆。二比丘尼衆。三式叉摩那衆。四沙

彌衆。五沙彌尼衆。六優婆塞。七優婆夷。前五是在家弟子。後二是在家弟子。此戒七衆同制。犯者皆得重罪。四大小同異。大者大乘七衆。小者聲聞七衆也。此戒與聲聞不全同。同者同不得殺。異者大士見機得殺。如下所明。又大士害二師。成逆聲聞。但結重罪。大士殺天犯重。聲聞非重。大士殺四趣。如上料簡。聲聞殺鬼神與殺天同。殺傍生又略輕。大士捨身不失戒。結罪如上說。聲聞捨身戒亦隨盡。不復結罪也。五善識開遮。唐譯菩薩戒本云。若諸菩薩。安住菩薩淨戒律儀。善權方便。爲利

他故於諸性罪少分現行。繇是因緣於菩薩戒無所違犯。生多功德。謂如是菩薩見劫盜賊爲貪財故。欲殺多生。或復欲害大德聲聞。獨覺菩薩。或復欲造多無間業。見是事已。發心思惟。我若斷彼惡衆生命。墮那落迦。如其不斷。無間業成。當受大苦。我寧殺彼。墮那落迦。終不令其受無間苦。如是菩薩。意樂思惟。於彼衆生。爲當來故。深生慚愧。以憐愍心而斷彼命。繇是因緣於菩薩戒無所違犯。生多功德。解曰。此則大悲增上。純以代苦之心而行殺業也。深生慚愧。明其不自以爲功能。以憐愍心。

明其實無一念瞋忿。故雖甘受犯戒之罪。而究竟無違犯耳。倘私忿未忘。或貪圖功德。駕言於大士弘規。豈能免性遮二業哉。六異熟果報。異熟者。異時而熟。異性而熟。異處而熟。異時者。今生造業。或現生受報。或來生受報。或無量生後受報。異性者。造業通於三性。謂善不善無記。受報惟屬無記之性。異處者。人中造業。六道酬償也。此殺生罪果報如何。華嚴二地品云。殺生之罪。能令衆生墮於地獄畜生餓鬼。若生人中。得二種果報。一者短命。二者多病。解曰。三途是正報。人中是餘報也。上殺

墮地獄。中殺墮畜生。下殺墮餓鬼。或約前文三品衆生分上中下。或約殺心猛弱分上中下。或雖造上罪。殷勤悔過。轉成中下。雖造下罪。護過飾非。不知慚愧。轉成中上。三義互成。事非一致。故業性差別。惟佛窮盡耳。持不殺戒。復得何報。十善業道經云。若離殺生。卽得成就十離惱法。一於諸衆生普施無畏。二常於衆生起大慈心。三永斷一切瞋恚習氣。四身常無病。五壽命長遠。六恆爲非人之所守護。七常無惡夢。寢覺快樂。八滅除怨結。衆怨自解。九無惡道怖。十命終生天。若能迴向阿耨多羅

三藐三菩提者。後成佛時。得佛隨心自在壽命。解曰。十離惱法。是花報。自在壽命。是果報也。又大乘理趣六波羅密經淨戒品云。此十善業。一一皆感四種果報。一現在安樂。二煩惱怨賊勢力羸弱。三於當來世。常得尊貴。無所乏少。四精勤修習。當得無上正等菩提。離殺四者。一菩薩於諸衆生。不起害心。能施無畏。亦不恐怖。以無怖故。一切衆生親近供養。尊重讚歎。菩薩於彼。生憐愍心。繇慈心故。過去所有一切怨恨。自然心息。二瞋恚害心。悉皆羸劣。以慈甘露用途其心。而能蠲除瞋等熱惱。睡

眠安隱。恆無惡夢。以慈心故。藥叉諸鬼食血肉者。捨離害心。及諸惡獸。常相守護。三者於未來世。獲三果報。一壽命長遠。常無中天。二所生之處。常無病苦。三大富饒財。恆得自在。四者以不殺故。得佛法分。於五趣中所生之處。於世自在。隨意能住。乃至坐於菩提樹下。諸魔鬼神。不能爲障。成等正覺。無量聖衆之所圍遶。解曰。此四果報。二屬現在。二屬當來。約之卽是轉三障義。除惡生善。卽是先轉業障。因業障轉。能令報障亦轉。兼能進轉煩惱。蓋業絲惑造報絲業感。不了業因。復從報法起惑。絲

業現行。亦熏煩惱種子。故三法展轉不離。如惡又聚。今先斷其業。不復熏於惑種。又旣令後報不起。亦令先報漸薄。此中初種卽轉現報。第二是轉煩惱。第三是轉生報。第四是轉後報也。夫以殺業苦報。其劇如彼。不殺善報。其大如此。金口誠言。纖毫無謬。奈之何不信受奉行哉。七觀心理解。有事殺。有理殺。事殺如上所明。理殺者。凡夫外道執常執斷。破害真諦。藏教析色觀空。破害俗諦。通教雖達無生。終歸灰斷。不知常住真心。是殺中諦。別教仰信中道。謂是迥出二邊。修中觀時。復殺二諦。惟

圓人了達一心三觀全體法界不動法界始從名字終於究竟皆不犯理殺也。八懺悔行法犯此事理二殺既各有輕重則欲合罪滅須知三種懺法不同。光明事理二殺輕重差別事殺有三差別。一逆二重三輕。重復分二。一失戒二不失戒。一失戒者又分爲二。一須見好相。如此經云若有犯十戒者應教懺悔要見好相便得滅罪。若無好相雖懺無益也。二堪任更受。如羯磨文云若諸菩薩毀棄淨戒於現法中堪任更受。又云若上品纏違犯他勝處法失律儀戒應當更受。不云須見好相也。

今會通其意。此經雖一往偏指十重而理須獨歸前四。以善生經中無後四戒。地持經中無第五第六戒。故羯磨文雖似獨指後四。而前六等流亦可例通。以殺盜等必有上中下別。非可一概論。故失戒重罪須通途作此二類也。二不失戒者。如羯磨文云非諸菩薩暫一現行他勝處法便捨菩薩淨戒律儀也。輕戒復二。一染汙起。或稱重垢。二非染汙起。或稱輕垢。今經總名輕垢。直對十重言之。實則輕戒之中復有重輕差別。兼有方便等流之不同。故今合而明之。共有六聚。一逆二失戒重不

任更受。欲受須見好相。三失戒重。堪任更受。四不失戒重。五染汙犯。及方便重垢。六非染汙犯。及方便輕垢也。此戒於六聚中。殺上品是逆殺。中品是失戒重。須見好相。殺下品是失戒重。堪任更受。或是不失戒重。又方便罪者。三品殺因殺緣皆輕垢。或上品緣。卽屬重垢。三品殺法皆重垢。或上品殺法。應同不失戒重也。理殺有四差別。一殺真諦。二殺俗諦。三殺中諦。四雙殺二諦也。次明三種懺法。一作法懺。二取相懺。三無生懺。此三種懺。前不兼後。後必具前。作法懺又有三種。一向一人悔過。二

向三人悔過。三向衆僧悔過。非染汙犯。及方便輕垢。但向一人悔過。罪便得滅。染汙犯。及方便重垢。須向三人悔過。或無三人。止向二人一人。亦可得滅。不失戒重。須向衆僧悔過。或無衆僧。向三二人亦得。設總無清淨大小乘衆。堪向悔過。但殷重自誓。終不復犯。罪亦得滅。若有人可向悔過。不得自誓。滅也。失戒重罪。堪任更受者。須向衆僧悔過。重受。失戒重罪。不堪更受者。卽須用取相懺法。取相懺者。所謂日夜六時誦重輕戒。苦到禮三世千佛。二七三七。乃至一年。以見好相爲期。此須十科行

道備極精誠。仍復內資理觀。外假壇儀。凡法華方
等大悲占察等一切行法。皆屬取相懺攝。能滅根
本重罪。令淨戒復生。亦能滅七逆罪。使重報輕受。
但不云使得戒耳。無生懺者。正滅理殺之罪。亦除
七逆重愆。此復四種。一析觀無生。謂觀此身六分
所成。所謂地水火風空識。微細推求。實無有我。及
以我所。二體觀無生。謂觀此身如幻如化。如鏡中
像。夢中物等。當體不實。彼六分法尚自不有。云何
復有我及我所。三次第無生。謂雖知中道佛性。含
靈本具。繇迷強故。不能頓觀。先觀一切假名諸法。

從因緣生。無有實性。從假入空。得見真諦。既見真
空。不住於空。從空出假。徧觀俗諦。二諦既明。遮照
和融。方歸中道。四一心無生。謂了知中道佛性。徧
一切法。如心佛亦爾。如佛衆生然。心佛及衆生。是
三無差別。此心卽空假中。三諦既是天然性德。三
觀亦非造作修爲。一心之中。法爾具足。如此觀智
全卽諦理。深達罪福相。徧照於十方。是名實相懺
悔。以迷則全實相而爲罪相。悟則全罪相而卽實
相故。是中析觀無生。能除凡外殺真諦罪。亦除七
逆。令得無根信。墮獄卽出。不復受一劫苦。如阿含

經中阿闍世王是也。但不能令現身證初果耳。體觀無生能除藏教殺俗諦罪。亦除七逆。例同阿含。次第無生能除通教殺中諦罪。亦除七逆。如阿闍世王轉重受輕身生惡瘡。照以月愛三昧光明。令免痛苦。得無根信。但不云得菩薩戒耳。一心無生能除別教雙殺二諦之罪。亦除七逆。如阿闍世王悟無生忍發迹顯本。卽是不可思議大菩薩也。九修證差別。別圓觀行位人。善伏煩惱能防故殺。相似初心。先斷見惑與藏通初果齊。得道共力。能斷故誤二殺。如釋種寧死不戰。是斷故殺。初果耕

地。蟲離四寸。是斷誤殺也。華嚴二地云。性不殺生者。此約教道。二地戒波羅密增上。或約理殺。二地卽是界外須陀洹果故也。藏教外內二凡。能防殺真諦罪。初果以上永斷殺真之罪。通教乾慧性地。能防殺俗諦罪。八人以去。亦復永斷別教初心。仰信中道。能防殺中諦罪。十住十行。猶未永伏。十向永伏。初地永斷兼斷雙殺二諦之罪。以證道同圓故。圓教初心。了知法界不壞一法。能防雙殺二諦之罪。故名第一清淨。亦復論於名字清淨。觀行清淨。乃至究竟清淨也。十性惡法門。善惡之法。皆

是性具。達其性。則能用善。用惡。而不被善惡所用。不達其性。則被善惡所用。不知稱性功能。以被善惡所用。故全性德而成逆順。二修感於苦樂。二報以能巧用善惡。故卽二修成合平等一性。成於折攝二門。今明性惡。復約二義。一用事殺。如古昔聖王殺仙。豫婆羅門等五百人。乃是與其無量壽命。此亦可稱爲善識開遮。又如無厭足王。幻作惡人而行治罰。沙彌吞食外道度令出家。證果等。皆巧用事殺也。二用理殺。所謂弑無明父。害貪愛母。護生須是殺。殺盡始安居也。前明不殺。必至佛果。方

得究竟清淨。此文明殺。亦至佛果。方得究竟殺盡耳。

庚 第二盜戒

若佛子。自盜。教人盜。方便盜。呪盜。盜因。盜緣。盜法。盜業。乃至鬼神有主劫賊物。一切財物。一針一草。不得故盜。而菩薩應生佛性。孝順心。慈悲心。常助一切人。生福生樂。而反更盜人財物者。是菩薩波羅夷罪。不與而取他物。名之爲盜。自盜有八種。或灼然劫取。或潛行竊取。或詐術騙取。或勢力強取。或詞訟取。或抵謾取。或受寄托而不還。或應輸稅而不納。

是名八種。教人盜者。教人爲我劫取。乃至爲我偷稅也。若但教人作八種盜。利不入己。不結重罪。是此戒兼制耳。方便盜者。彼物自來。方便藏舉。如攘羊之類。呪盜者。以種種呪術。取他物。或遣役鬼神等。盜因者。興心故。取他物。或以諂心。或以曲心。或瞋恚心。或恐怖心。是名盜因。盜緣者。穿窬窺闕等緣。盜法者。發鑰。揀取等事。盜業者。舉他物離本處。乃至等者。舉輕況重。佛性者。一切衆生。皆有當果之性。性是不改爲義。卽前戒中常住之意。盜人財物者。意顯從人邊結重也。此戒亦具性遮二業。

以侵他依報。奪他外命。令他憂苦。王法亦治罪故。五緣成重。一是有主物。二有主想。三盜心取。四直五錢。五舉離本處。主有三品。若佛物。法物。現前僧物。四方僧物。父母師長物。名上品。若人天物。名中品。若鬼神畜生物。名下品。盜上品。及中品。中人物。則重。盜中品。中天物。及下品物。結輕。或雖重。不失戒。二有主想。亦具當疑僻六句。有主。有主想。有主疑。二句結重。無主。有主想。有主疑。二句結輕。有主。無主想。無主。無主想。二句無犯。又人物。人物想。人物疑。二句結重。人物。非人物想。及非人物。非人想。

人物疑非人物想。四句結輕。三盜心者非與想。非己物想。非糞掃想。非暫用想。非親厚想。正是業主。四直五錢者。西國一大錢。直十六小銅錢。若取五錢。若取直五錢物。結重。四錢以下。結輕。或雖重。不失戒。若一番三番。共取五錢物。有意相續者。數滿結重。無相續意者。逐次結輕。若所取物。此處不直五錢。取處直五錢者。結重。若此處直過五錢。取處不直五錢。結輕。五舉離本處者。他物置在此處。移動令出本界。或自移。或教他移。或方便移。或呪移。從此時結成盜罪。詳如五戒相經中說。若抵債不

還前人。決作失想時結罪。若受寄不還。亦於前人決作失想時結罪。若偷稅已過關津。不復受詰時結罪。若教人盜。前人受教。取離本處時結罪。若教人取某處某物。彼人於異處取。或取異物。彼人結重。教者結方便罪。若教者是盜心。受教者無盜心。謂是取彼所應取物。取離處時。教者犯重。受教者無犯。若教者非盜心。受教者謂是盜心。取離處時。受教者犯重。教者無犯。若教令盜五錢物。受教者取得四錢以下。二俱結輕。若教盜四錢以下。受教者取得五錢以上。受教者結重。教者結輕。若本意

不論多少。隨取離處時。二人同其輕重。若二人共盜取物。離本處。直五錢。雖分時各得減五錢。然各犯重。若但教人盜。本無心欲取其分。離處時不結重。後受其分。知是所盜物者。結罪。不知者無罪。此生有戒無戒。後生憶不憶等。其如殺戒中辨。不犯者。與想已物想。糞掃想。暫用想。親厚想。若癡狂。若心亂。若病壞心。若轉生不自憶知。七眾同犯。大小乘不全共。同者。同不得盜。異者。大士見機得盜。如下所明。舊云。聲聞於佛滅後。盜佛物。輕。菩薩恆重。今據僧祇律中。寺主用塔物供僧。直五錢。卽

結重。況自用耶。又畢陵伽婆蹉。於賊舟上取檀越二子。還其父母。以無盜心。不名犯戒。亦是見機得作之意。未必一向與大乘異也。開遮者。菩薩戒本云。又如菩薩見有增上。增上宰官。上品暴惡。於諸有情。無有慈愍。專行逼惱。菩薩見已。起憐愍心。發生利益安樂意樂。隨力所能。若廢若黜。增上等位。由是因緣。於菩薩戒無所違犯。生多功德。又如菩薩見劫盜賊。奪他財物。若僧伽物。宰堵波物。取多物已。執爲己有。縱情受用。菩薩見已。起憐愍心。發生利益安樂意樂。隨力所能。逼而奪取。勿令受

用如是財物當受長夜無義無利。由此因緣所奪財寶。若僧伽物還復僧伽。窣堵波物還窣堵波。若有情物還復有情。又見衆生。或園林主。取僧伽物。窣堵波物。言自己已有。恣情受用。菩薩見已。思擇彼惡。起憐愍心。勿令因此邪受用業。當受長夜無義無利。隨力所能。廢其所主。菩薩如是。雖不與取。而無違犯。生多功德。解曰。前條是奪他名位。後條是奪他財寶。以憐愍心。能生功德。然僧伽物還復僧伽。乃至有情之物還諸有情。故無犯也。倘分毫沾染。是名賊復劫賊矣。果報者。華嚴二地品云。偷

盜之罪。亦令衆生墮三惡道。若生人中。得二種果報。一者貧窮。二者其財不得自在。解曰。盜亦三種。三品。牽墮三塗。例如殺戒所明。其財者。世間財物。五家所共。謂王。賊。水。火。不肖子孫。惟功德法財。乃不其他有也。十善業道經云。若離偷盜。卽得十種。可保信法。一資財盈積。王賊水火。及非愛子。不能散滅。二多人愛念。三人不欺負。四十方讚歎。五不憂損害。六善名流布。七處衆無畏。八財命色力安樂。辯才具足無缺。九常懷施意。十命終生天。若能迴向菩提。後成佛時。得證清淨大菩提智。淨戒品

云。離不與取。亦四果報。一者於現生中得離貪嫉。身心安樂。二者以離貪嫉。一切衆生之所信向。委寄任用。無復疑惑。與諸有情而作伏藏。三者於未來世得大富饒。豪貴自在。所有珍財。主賊水火。無能侵奪。四者能與苑伽沙等一切諸佛主功德藏。所謂十八不共法等清淨法財。二乘之人耳尚不聞。何況得見。觀解者。有事盜。有理盜。理盜者。未達性具法門。心外取法。取非其有。故名爲盜。凡夫盜有。外道盜空。二乘盜真。菩薩盜俗。別教盜取中道。惟圓人了達性徧性具。不於心外別取一法。不

犯理盜。懺悔者。若盜三寶。父母師長物。失戒。先須償還。方行取相懺法。盜人道物。失戒。償與不償。隨時斟酌。懺須取相。盜天及鬼神畜生物。須向衆僧悔過。或向三人悔過。又三品盜。因盜緣。向一人悔。上中二品盜法。向三人悔。或向衆僧。下品盜法。向一人悔。或向三人。盜有盜空。懺以析觀無生。盜真盜俗。盜中皆悉懺。以一心無生。又一心三觀妙。無生懺。通滅一切事盜。理盜也。修證者。別圓觀行位人。能防故盜。相似初心。位齊初果。永斷故盜。華嚴二地中義。如殺戒辨。藏教內凡外凡。伏於空



70063210

有二盜。初果永斷盜空。四果永斷盜有。圓教觀行。圓伏盜。真盜俗盜中之罪。初住分斷。妙覺究竟斷盡。別教登地。證道同圓。亦能分斷理盜。性惡者。事盜如開遮所明。理盜則菩提無與者。然我取菩提。三世諸佛。乃稱究竟大盜耳。

佛說梵網經菩薩心地品合註卷第三

